

3

HARVARD COLLEGE LIBRARY  
FROM THE  
HARVARD-YENCHING  
INSTITUTE  
SEP 30 1929

~~Ch L 5570.7/2928~~

T 5237.7/2928



明詩綜卷三

小長蘆 朱彝尊

錄



舊吳 何煜 緝評

汪廣洋 三十一首

廣洋字朝宗高郵人洪武初為中書左丞封忠勤伯拜右丞相尋貶廣東有詔數其罪自縊死

有鳳池吟

宋景濂云右丞以絕人之資博極羣籍作為詩章從征伐則震蕩超越在廊廟則莊雅尊嚴 徐子

元云忠勤詩如瑤臺月明鳳笙獨奏 王元美云汪朝宗如胡琴羌管雖非太常樂琅琅有致 俞汝成云右丞氣骨雄渾語意爽朗卓然可

傳 顧玄言云忠勤詞新調閒不失唐人大簡 穆敬甫云汪詩如春林舒葉嬌鳥羣飛又云高朗有致構思頗覺不苦

靜志居詩話忠勤詩饒清剛之氣一洗元人纖縟之態五言如平沙誰戲馬落日自登臺湖水當門落松雲倚枕浮懷人當永夜看月上疎桐對客開春酒當門掃落花天垂芳草地漁唱夕陽村倒藤懸宿鳥絕壁挂晴霓暮雲生楚樹涼雨過邗溝碧樹藏蠻邏清歌發蜃舟江雲垂暝



遠楚樹入秋多濁酒傳杯重烏絲界紙勻岸沙留醉卧山鳥答行歌晴  
光生北固暮雨隔西津溼雲纏戍鼓高柳聚城鴉濁浪橫衝海斜陽半  
在船雲木深藏廟淮流直到門沙明宜見雪月上可行舟涼風吹雨過  
好鳥背人還春杯黃秫酒野飯碧芹羹欲往尋芝草因之采茯苓可入  
唐人主客圖靜居北郭  
猶當遜之母論孟載也

別知己

北風吹征帆飄飄西南馳山川聿修阻霜露忽淒其今  
我遠行邁豈不念歲時翩彼晨飛鴻翱翔亦何之感我  
同袍友感感懷此離此離雖可懷觴酒當載持各言崇  
令德金石以為期

明發

膏車待明發逶迤上河梁親朋羅祖餞冠蓋燦成章條  
風被原隰春日當載陽鳴鳥餘好音雜葩紛衆芳魴魚

始登薦旨酒屢充觴既醉復瞋言欲去故徬徨維周仲  
山甫王命慎所將夙夜無有懈庶幾終允臧斯言啓深  
省勗哉何日忘

過宜興西泠

廣韻於  
蹇切

青青銅棺山下有郡西泠泠鹵居者多頗與市聲遠野  
篠接深塢疎梅照清淺一丘與一壑安分良足遣我行  
日驅馳適此遂遊行

登忠勤樓聽久孚賀架閣彈琴

画棟棲朝霞層檐宿秋霧振衣坐前楹援琴寫中素幽  
泉鳴澗深落花傷春暮油然聞至音令人起遐慕

繁昌夾



田言錄卷三  
二  
繁昌夾繁昌夾口江流狹波濤洶洶雲冥冥蘆葦蕭蕭  
風颯颯擢郎三日無北風背牽百丈行澤中前歌未斷  
後歌發野煙孤沒驚飛鴻繁昌夾流深幾許繁昌人民  
夾前住苦竹截篙蘆縛舟打魚燒山自成趣人生處世  
何者榮一褐足以安其生但得有溪可漁有土可耕何  
用出入誇肥輕君不聞五陵公子多豪舉甲第連雲燿  
飛翥朝聞鼙鼓擊春風暮見彤扉鏤秋雨

寄西掖諸友

玉簫吹鳳皇關月寫滄浪故國幾時到高樓今夜長  
候蟲啼露壁涼葉下銀牀無限懷人意裁詩遠寄將  
忠勤樓諸老夜直余時守省作詩寄之

西掖延秋爽高樓倚太清玉繩當坐轉銀漢近人明上  
相思經濟諸公任老成不知前席夜曾語及蒼生

晚晴江上

江水鴨頭綠楚山螺髻青鷓鴣啼不盡花發樹冥冥微  
風汎蘭槳落日過松亭勝境思彌愜漁歌隨處聽

登蔣山望江亭次韻

絕頂出華構有時來一登曾將六朝事閒問百年僧寓  
目誠多感投身媿未能暫留林下夕江浦散漁燈

送院判俞子茂進兵番易

江東風日晴把酒送君行好慰三千士將收七十城煙  
花催壘鼓雲騎擁連營山國人爭喜殊方自此清



寄崔元初

晴軒種竹罷好月到窗時坐我長松下歌君流水詩墓  
田歸野雀疎雨落山葵偶值南來使殷勤寄所思

嶺南道中

過盡梅關路灘行喜順流滩江元到海橫石不容輟嶺  
樹垂紅果汀沙聚白鷗從來交廣地還是古揚州

灘行

灘上水平沙梭舟蕩落花吳儂不相識對面浣春紗

蘇溪亭

蘇溪亭上草漫漫誰倚東風十二闌燕子不歸春事晚  
一汀煙雨杏花寒

山行

米家圖畫不易得今日見山如見之偶上層巒縱游月  
不知駐馬已多時

江上 三首

大山小山松樹齊千聲萬聲子規啼攬衣起舞夕露下  
三更月落吳城西  
褚磯口闊浪如山官船客船前後灣明日天晴大家喜  
看我鼓枻中流還  
象牙灘上百花開參差時復見樓臺翠香芹菜綠沙出  
雪色鱖魚上水來

夜泊楊子橋



楊子橋頭夜泊船水波纔定月初圓不眠細數經行日  
笑隔東風又一年

嶺南雜詠

五首

牂牁流水碧潺潺潮落潮生草木閒一片海雲吹不起  
越人遙指是崖山

鴈翅城東湧怒濤外洋水長蜚船高莫言昨夜南風急  
今日登盤有海壕

越鹽如雪賽吳鹽諸蕓初肥竹筍甜何事看山蘇太守  
只將雙蟹較團尖

村園社日喜晴和銅鼓齊敲唱海歌都道二年生計足  
五收蠶繭兩收禾

蠻落人家厭食魚兒孫生長不知書枕榔滿種綠山邏  
翡翠新收越海墟

涼州曲

琵琶初調古涼州萬壑風泉指下流好是貞元無事日  
玉宸宮裏按新秋

竹枝詞

三百六十灘水清桃花春漲近來生催歸不待臨岐語  
昨夜子規啼到明

東吳權歌

二首

太湖茫茫水拍天吳儂只慣夜行船竹枝敲罷燈將滅  
風雨蕭蕭人未眠



艇子搶風過太湖水雲行盡是東吳阿誰坐理青絲網  
遮得松江巨口鱸

蘭溪櫂歌 二首

涼月如睂挂柳灣越中山色鏡中看蘭溪三日桃花雨  
夜半鯉魚來上灘

櫂郎歌到竹枝詞一寸心腸一寸絲莫倚官船聽此曲  
白沙洲畔月生時

晚過清河驛

溯流西望渺如煙黃帽齊將百尺牽日暮雨來風浪惡  
隔河槳鼓換官船

陶安 二首

安字主敬太平府人元末為明道書院山長王  
師渡江首率父老奉迎留置幕府歷左司郎中  
出知黃州降桐城令移知饒州仍改知黃州召  
為翰林院學士尋擢江西行中書省參知政事  
卒于官贈姑孰郡公追謚文憲有知新臺江行

雜詠 俞右吉云郡公謀略文章孝陵推為  
第一詩亦拔俗五古未免冗長耳

寄豐叔良

阿咸九月到寄我尺書看盡日不釋手空江頻倚闌鄉  
山微雨外客夢一窗寒遙想林泉勝無憂寢食安

湖鄉

淝水新無警湖鄉頗有年稻田驅夜豕蓮蕩捕秋鱖



卒黃茅戍歸人白板船數家依綠樹斜日照炊煙

孫炎 三首

炎字伯融句容人國初辟行省掾尋以省都事

總制處州會苗將叛被擒罵賊死追封丹陽縣

男謚忠愍有左司集

徐子元云左司詞氣豪邁類其為人渥注神駒一蹴千里王元美云孫伯融

如新就銜馬步驟未熟時見輕快

詩話伯融至正中與天台丁復同郡夏煜皆以詩名下筆百紙立盡譎處似李長吉質處似元次山在處時明祖命招致伯溫伯溫堅不肯出以寶劍遺伯融伯融作詩以為劍當獻天子封還之伯溫無以荅乃逡巡就見而李時遠詩統謂此劍左司家藏作歌以贈劉者誤也

### 寶劍歌

寶劍光耿耿佩之可以當一龍直是陰山太古雪為誰  
結此青芙蓉明珠為寶錦為帶三尺枯蛟出冰海自從

虎革裹干戈飛入芒碭育光彩青田劉郎漢諸孫傳家

惟有此物存匣中千年睡不醒白帝血染桃花痕山童

神全眼如日時見蜿蜒走虛室我逢龍精不敢彈正氣

直貫青天寒還君持之獻明主若歲大旱為霖雨

### 題好溪圖送憲使黃繼先

君乘馬望君來枯蒼下君乘舟望君來好溪頭好溪水

生玳瑁魚好溪水生明月珠好溪水生青珊瑚使君來

此月再樞惟飲此水無一需使君之清水不如臨別贈

君青絲轡隨君馬頭行萬里相思之心有如水

### 贈黃鍊師

留侯弟子有初平九歲從師往玉京天與數書皆鳥迹



家傳一劔是龍精  
瑤池桃核無消息  
海水桑田又淺清  
我為紫芝歌一曲  
夜深相荅洞簫聲

全思誠 一首

思誠字希賢上海人  
洪武十五年以耆儒召為  
文華殿大學士兼左中允  
致仕有砂岡集

寄題玉山草堂

草堂中人天下奇  
昔聞盧鴻今見之  
鯨牙已出滄海底  
鳳雛猶隱崑山陲  
村醪醉客飛鑿落  
竹牀卧月吹參差  
相知何必曾相識  
画裏題詩寄所思

鮑恂 三首

恂字仲孚崇德人  
元末薦授翰林不就  
洪武四年

年會試充考試官  
十五年詔徵耆儒入見  
命為

文華殿大學士  
固辭放歸有西溪漫橐

周青士云西溪詩傳

者絕少曩聞海鹽胡氏有刊本求之不得嘗見其題画詩云山橫紅葉晚寺鎖碧雲涼亦佳句也

詩話湖州嘉興二志並云仲孚與安吉余詮上海全思誠高郵張長年四人就徵考實錄入見祇三人其同徵一人未至乃登州張紳非思誠也又洪武四年會試仲孚以前貢士與翰林院侍讀學士詹同同文國子監司業宋濂景濂吏部員外郎原本景道同充考試官是年主文官則禮部尚書陶凱中立前翰林院侍講學士潘庭堅升聞也王元美別集所述未合

寓感

迢迢漢川上有女  
麗且閒佩以雙明珠  
遊戲清波間翩然若飛鴻  
可望不可攀  
贈我翡翠羽報之以秋蘭  
徘徊碧雲暮引領空長歎

題吳仲圭平遠圖



蒼山遙遙幾千里綠樹參差碧煙起雙帆忽從江上歸  
影落斜陽濕秋水林陰蒼莽鳥不飛石徑蹭蹬行人稀  
松根似可縛茅屋沙尾亦足容漁磯我嘗西遊倚江閣  
極目長空入寥廓好山不肯過江來恨不乘風跨黃鶴  
吳君画手當代無落筆何年成此圖安能著我巖壑底  
相覓老樵尋釣徒

盛叔章画

煙濕空林翠靄飄渚花汀草共蕭蕭仙家應在雲深處  
祇許人間到石橋

朱善一首

善字備萬豐城人洪武初官至文淵閣大學士

卒謚文恪有一齋集

遠別辭送餘干令李謙山

風淅淅兮雲悠悠木葉落兮天宇秋君胡為兮不返嗟  
久客兮淹留攬西山兮秀色泛東湖兮弄明月樂莫樂  
兮新知心奚忍兮輕別山有虎兮湫有龍勞余思兮忡  
忡眇餘干兮何許揮五絃兮送孤鴻父老子兮扶藜兒童  
兮竹馬侯之去兮我心悲侯之來兮我憂寫桂櫂兮蘭  
舟搵子祛兮夷猶南州雖好兮不可以久處嗟子去兮  
何以慰我之離愁

宋訥八首

訥字仲敏滑縣人元季官鹽山知縣國初徵為



國子助教陞翰林院學士文淵閣大學士遷祭  
酒卒于官正德中追謚文恪有西隱橐

李時遠云  
宋公師道

尊嚴為一代典型詩文渾  
健古雅同游諸儒皆推之

詩話高季迪之文蘇平仲之表箋泐公之詩當時文字之禍烈矣然其  
間遺民諸集類不避諱當王師之入燕也若王原吉丁鶴年戴叔能陳  
敬初輩其詩詞指斥未易更僕數宋公身歷通顯其過元宮諸詩悲涼  
酸楚雖初明通天之表子山江南之賦無以踰之他若華表柱頭相語  
鶴秣陵江上獨歸鴻半船涼色潮生海兩岸秋風浪拍沙縛蘆密覆低  
低屋把竹輕撐小小船野航招客買蓮子沙鳥驚人入荻花夕陽野飯  
烹魚釜秋水蒲帆賣蟹船斷壁野花  
迎客權壞牆津柳曬魚罾句亦自佳

壬子秋過故宮

八首

離宮別館樹森森秋色荒寒上苑深北塞君臣方駐足  
中華將帥已離心興隆有管鸞笙歇劈正無官玉斧沉  
落日凭高望燕薊黃金臺上棘如林

萬國朝宗拜紫宸于今誰望屬車塵名聞少室徵奇士  
驛斷高麗進美人朝會寶燈沉轉漏授時玉曆罷頒春  
街頭野服儒冠老曾是花塲視草臣

黃葉西風海子橋橋頭行客弔前朝鳳皇城改佳游歇  
龍虎臺荒王氣消十六天魔金屋貯八千霜塞玉鞭搖  
不知亡國瀘溝水依舊東風接海潮

鬱蔥佳氣散無蹤宮外行人認九重一曲歌殘羽衣舞  
五更妝罷景陽鐘雲間有闕摧雙鳳天外無車駕六龍  
欲訪當時泛舟處滿池風雨脫芙蓉

五雲雙闕俯人間歲晏天王狩未還鸚鵡認人宮漏斷  
水沉銷篆御牀閒朝儀無復風雲會郊祀空遺日月顏



莫向邊陲動戎馬漢兵已過鐵門關

萬年海岳作金湯一望淒然感恨長禾黍秋風周洛邑

山河殘照漢咸陽上林春去宮花落金水霜來御柳黃

虎衛龍墀人不見戎兵騎馬出蕭牆

清寧宮殿閉殘花塵世回頭換物華寶鼎百年歸漢室

錦帆千古似隋家後宮鸞鏡投江渚北狩龍旗沒塞沙

想見扶蘇城上月照人清淚落悲笳

雲霄宮闕錦山川不在穹廬毳幕前螢燭夜游隋苑圃

羊車春醉晉嬋娟翠華去國三千里玉璽傳家四十年

今日消沉何處問居庸關外草連天

詹同 十二首

同字同文初名書婺源人元末為郴州路學正

遇亂家黃州仕陳友諒為翰林學士承旨歸附

後賜今名授國子 一云中書 博士累官吏部尚書改翰

林學士承旨諡文憲有天衢舒嘯 宋景濂云同文襟期瀟灑濟以雄博

之學故體物瀏亮鏗鏗作金石聲徐子元云同文赤色精金與鑰銘自別

詩話同文與吳濬仲樂致和宋景濂齊名號中朝四學士吳樂韻語寥寥宋亦非其本色於四子中遂為翹楚

### 清江曲

清江水清峽水黃清江之上多綠楊浣花女兒立沙際

青裙白足如秋霜蜀山雪消十日雨一夜扁舟欲齊樹

兩岸猿聲不肯休送君流過峽川去

北邙行



日言錄卷三  
十一  
纍纍北邙墳鑿石爲虎羊憶昔葬此初爵封侯與王導  
以方相氏飄飄銘旌揚紫車雜編騎鐃鼓喧周行執紼  
人如蟻哭聲動穹蒼相送至窀穸日暮下黃腸生旣享  
華榮死亦增輝光焉知千載後無人奠穀漿寶氣夜忽  
露大盜發所藏不見馬鬣封但見白骨荒空留一斷碑  
龜趺卧夕陽遂令往來者過此生感傷感傷亦何爲生  
死人之常陰陽有晝夜誰云無興亡萬物終消盡天地  
復渾茫何史垂功名何世存文章金石且不堅豈獨人  
久長

秋夜吟

桂樹叢叢月如霧山中故人讀書處白露濕衣不可去

題方壺水石圖

古壁之間屋漏痕淋漓元氣凝清渾道人山中守龍虎  
十日不見煙塵昏拂拭填作一枯木下有碎石分崑崙  
斷劍插入怪厓底老蛟迸出秋雲根神君怒立被玄髮  
欲騎鐵驥超天門當時揮灑妙莫測鬼物驚走如星奔  
青城仙伯絕筆久覩此髣髴其人存玄同隱者臥松雪  
得画遠寄來江村却憶麻姑洞口樹使人一夜勞心魂

題善原道韓幹黑馬圖

善家堂上書滿厨古今名画頻卷舒我來一見韓幹筆  
龍精自與凡馬殊玄鬣披披首渴烏紫瞳燄燄雙明珠  
黑雲一片忽墜地房星半夜飛神都御溝流水柳千樹



日言錄卷三  
三十  
圍人騎出拂春露黃金腰帶素花衣馬上回頭看飛絮  
絲韁在手不敢縱追風恐過龍樓去君不見向來画馬  
只画肉神逸之氣多不足幹遺真蹟世所稀使我見此  
思天育善家兄弟一馬驄此馬真與麒麟同白璧玉斗  
亦不換早晚持獻明光宮

送德安張用周遊廬山

匡廬山高雲氣多老木如石盤紫蘿松橋流水度金澗  
我昔結屋山之阿棗落洲邊種柑橘蓮花峰下尋芝朮  
仙宮臺榭作比鄰每欲相從候丹術寄詩畫喚白猿來  
巡杏夜驅玄虎出飛仙別去今幾年海上不見回樓船  
思之夢繞瀑布水玉琴爲奏冰絲絃張君多古學才器  
何卓犖紛紛文狸赤豹間五色麒麟生一角朝辭白兆  
山暮過黃鶴樓去觀五老峰翠色連天浮醉揮綠玉杯  
笑贈珊瑚鈎商婦亭前歌窈窕灌嬰井上嘶驂駟讀書  
白鹿之洞裏寫字洗墨之池頭匡廬清泉消百憂我所  
樂處君當遊霓旌羽駕在丘壑相逢往往皆仙流與君  
大藥駐光景人間回首三千秋

高暹獻天馬圖歌

蜀人高暹能画馬令人往往愁龍化凡夫肉眼匪方歎  
世間誰是識龍者前年曉御慈仁殿拂郎之國天馬獻  
鬣筋虎脊渥洼姿長風西來起雷電侍臣傳敕貌真龍  
周郎爲圖圖最工玉堂學士揭曼碩早朝奏賦蓬萊宮



當時觀者集如堵敕賜金盤五色露天馬出馳海子東  
但見中天黑煙霧君不聞太宗奔虹赤玄宗照夜白唐  
初曾數江都王今之名画亦難得吾聞高暹善草書墨  
池向復飛龍駒黃鶴樓中獻馬圖藩王一見極所娛天  
機剪取雲錦段玉盃分賜葡萄珠好去京師謁周郎應  
見揮毫九天上翠華所駕皆龍媒何事江南繪屏障

出獵圖

朔風凜凜吹龍沙年年馬上長為家陰山大漠百草死  
獵遍青海濱天涯旌旗裂盡霜華濕萬騎貔貅似雲集  
蒼鷹歛起若飛電四尺神獒作人立什圍五攻兵法存  
發蹤指示知何人豈無詭遇獲禽者誰能為爾鸞梟分

直將勇氣飽所欲寢虎之皮食虎肉生擒山下九青兕  
射殺巖前雙白鹿日暮歸來雪洗箭血灑腥風滿河曲  
穹廬散野如繇星涼月蕭蕭照平陸酪漿跪進瑪瑙盃  
黃面奚奴眼睛綠明朝滿馬馱爛斑蕃王喜生紅玉顏  
焉知祝網三驅意但醉氍毹紫塞間君不見暴殄天物  
焚咸丘画師之筆學春秋還君此圖長太息使我忽憶  
比蒲蒐

題松鶴蔡先生家藏李伯時西嶽降靈圖

前二人騎  
行後三人

徒步狀若馳獵者其最後則有雲氣神人居中嗟夫禹鼎象姦齊諧志怪  
世或有之但恨無胥臣之多聞子產之博物歷覽載籍未遑夷考模寫画  
像為作短篇  
以俟知者

龍眠居士画入神展画冥搜画中意白日杲杲人出畋



長風蕭蕭雲拂地前有一匹雪色駢次有一匹玄花驄  
兩人冠服何其雄若非將相應王公繇纓寶鞍金匠匠  
各持羽箭懸雕弓後有三人總徒步蒼鷹黃犬行相從  
雲中歛見光燦爛玉輅瑤輿下霄漢不駕紫鳳白麒麟  
海犀天駟多奇玩鸞旌虎節旋低昂星仗霞幢互繚亂  
無乃朝辭太華峰得非曉過雲臺觀輦中坐者真天人  
冕珠龍袞儼昭煥金童玉女續往來慶雲為馭天為階  
長眉刷翠面如月知有道骨無塵埃令人可望不可及  
恍惚雲中相出入衣霑玉井碧蓮香旗翻仙掌露華濕  
我識泰山封禪書不識此画當何如人言西嶽降靈圖  
西嶽或有人間無

送黎蘭谷遊永川

舟子開帆日天風吹雪時關河歲將晏荆楚客何之水  
接三苗國雲迷二女祠經過逢北鴈應有寄來詩

題雲林丹房為葛元德賦

盤龍菴前翠可食道人鑿雲開竹房丹光出林如月白  
石髓滿山連水香每聞向此采芝朮欲往從君愁虎狼  
展圖使我空歎息三十六峰清夢長

題山陰草堂

草堂正在匡廬山山陰綠玉相對閒雲從雙劍峰前下  
潮到小孤江上還茶煙滿室寫墨竹花雨一簾觀白鷗  
誰似南宮能篆古為君高置軒窗間



宋 濂 五首

濂字景濂浦江人元末用薦除翰林編修以親老辭入仙華山為道士國初徵至授皇太子經居禮賢館修元史充總裁官仕至翰林學士承旨兼太子贊善大夫正德中追謚文憲有潛溪翰苑芝園蘿山諸集

俞汝成云學士詩文俱著而文勝於詩然開國文獻之傳集固不可闕者王

元美云宋景濂王子克雖以文名而詩亦嚴整妥切 顧玄言云公文既博綜詩稍平易 李舒章云公開國文士之冠猶襲元調 朱朗詣云太史之文舍人遂之書評者以本朝第一日之韻語則非所長集雖多不作可也

詩話王子克敘景濂集云古今文章作者未易悉數即發而論南渡後有東萊呂氏說齊唐氏龍川陳氏各自成家而香溪范氏所性時氏先後又間出近則浦陽柳公烏傷黃公竝時而作踵二公而起者為吳正傳氏張子長氏吳立夫氏當呂氏唐氏陳氏之竝起也新安朱子弟子曰勉齋黃氏寔以其學傳之北山何氏而魯齋王氏仁山金氏白雲許氏以次相傳胡仲申敘王子克集云吾發以學術稱者至元中則金公

吉甫胡公汲仲為之倡汲仲之後則許公益之柳公道傳黃公晉卿吳公正傳胡公古愚卓立竝起而張公子長陳公君采王公叔善又皆彬彬附和於下言文獻之緒者以發為首稱合兩公之言繹之金華文章理學之源備於是矣景濂於詩亦用全力為之蓋心慕韓蘇而具體者

哀海東 有序

客有吏於海東者以能擊貪暴聞然終用是受誣嘔血死予友胡徵君為著哀辭一通予讀之甚悲竊取其意作哀海東傷妣女二操使善琴者彈而和之

我哀東海而思之苦彼何人斯猛噬如虎我不擊之我民之憂縱不我與覆以我為仇蒼天雖高冤其有極非血之嘔曷明心赤泱泱大風沉沉寒泉舍旃舍旃我尚何言



傷姝女

有姝者女顏如舜英詆我以醜我其何傷眩白為黑古亦多有自尤不遑敢誰之咎黃鵠飛來其音閭閻我心苟安何戚弗欣天上地下命也奈何我焉知其他

灘哥石硯歌

有序

朱舍人芾雅士也近見灘哥石硯禁中遂摹搨一本裝池成軸懸之書齋命予作歌填其空處

歌曰

朱君嗜古米黻同三代彝器藏心骨灘哥古硯近獲見驚喜奚翅逢黃琮研煤敷紙巧摹搨訪我一陳始終有唐四葉崇象教梵僧航海來番禺手持貝葉寫健相

翻譯華竺談玄空辭義幽深衆莫識當時授筆唯房融硯中淋漓墨花濕助演真乘誠有功愛其厚重為題識七月七日元神龍鬼工雷斧琢削古天光電影生新容衰將四尺廣踰半作鎮弗遷猶華嵩涉唐入宋歲五百但見寶氣浮晴虹南渡羣公競賞識氏名環列縈秋蟲朔元雖以實內府棄寘但使煙埃封方今聖人重文獻氈蒙舟載來江東風磨雨濯露精彩奉勅昇入文華宮宮中日昃萬幾暇侍臣左右咸雲從紫端玄歛盡斥去欣然為此回重瞳重瞳一顧光照日天章奎画分纖穠有才沉霾恨已久石如能語誇奇逢維昔成周全盛日兇戈屑衣并大弓藏諸天府遺孫子用以鎮國昭無窮



願將斯硯傳萬世什襲不下古鼎鐘上明文德化八極  
下書寬詔蘇疲瘵君方執筆掌綸誥願以此言聞帝聰  
老臣作歌在何日洪武戊午當嚴冬

題長白山居圖

滿地雲林稱隱居燕泥污我讀殘書五更風急鳥聲散  
時有隔花人賣魚

宜興強如心避地而歸扁其居曰復初齋來徵予

詩

昔日攬槍照五兵今歸喜得見時平春風綠酒扶殘醉  
斜立官橋聽早鶯

王禕十一首

禕字子充義烏人國初徵為中書省掾詔修元  
史與宋濂同為總裁官書成拜翰林待制奉使  
招吐蕃至蘭州召還改使雲南抗節死建文元  
年贈翰林學士謚文節正統中改謚忠文有華

川玉堂二集

徐子元云子充詩亦純雅 俞汝成云忠文詩平易切實然在當時與宋潛溪首倡浙東功不可泯 詩話子充文脫去元人冗沓之病體 製明潔當在景濂之右惟詩亦然

南康郡齋書事

郡解新落成餘木蔭階祀稍欣吏牘稀麤覺民事理檐  
崔不相猜羣飲硯池水

長安雜詩四首

崔嵬終南山形勢甚磅礴西來挾崆峒東亘聯華嶽長



雲覆重巒紫翠入寥廓杞梓產深林龍蛇蟄幽壑淑靈之所鍾宜有異人作如何千載間蹤跡轉蕭索姬旦不復生三代已云邈後來王佐才勞我思景略

羣經載聖道昭昭如日星秦火一何烈燒燔滅其形漢儒事掇拾區區補殘零雖然有遺闕其功亦已宏唐世尚文學君臣益留情琬琰刻文字後先十三經謂茲金石堅不與竹帛并自從鴻都後此刻最爲精羅列黌舍內奎壁映晶瑩我言金與石有時亦銷崩有形必有弊斯理詎難徵安知聖人道所託非所憑天地共終始猗歟罔能名

步出城東門穹然見丹牆不知何王宮金碧猶煒煌云是元帝子分茅鎮此疆傳世僅三葉嗣胤今滅亡深宮闕珍果迴溝亂垂楊撫物足流盼感時忽凝傷自古有興廢天道非茫茫

人生百年中窮通無定跡譬如風前花榮謝亦頃刻當時牧羊豎尊貴今誰敵顛顛種瓜翁乃是封侯客丈夫苟得時糞土成拱壁一朝恩寵衰黃金失顏色古昔諒皆然今我何歎息

送許時用歸越

舊擢庚寅第新題甲子篇老來諸事廢歸去此身全煙樹藏溪館霜禾被石田鑑湖求一曲吾計尚茫然

秦州



水積從天降山連與蜀通遺碑李廣宅廢寺隗躡宮度  
隴遲迴際游秦感慨中長憐少陵老曾此歎塗窮

通池道中

九月忽又暮吾行祇自傷秋兼人共老愁與路俱長野  
果迎霜赤園花帶雪黃故人相慰藉日晚引壺觴

春日繡湖與德元同行

十里華川上年來足勝游雨花林下寺風柳驛邊樓漠  
漠芙蓉浦依依杜若洲平生身外事未許付浮鷗

吳江客中冬至日

十年奔走竟何依轉覺謀生事事非時序每驚愁裏換  
家山長向夢中歸吳江歲晚寒波積楚塞天空鴻雁稀

酒後登樓倍惆悵緇塵猶滿舊紅衣

桐廬舟中

瀟灑溪山夢此邦輕風細雨過桐江川迴幾訝船無路  
林缺時看屋有窗野果青包垂个个水禽白羽去雙雙  
到家會值重陽節新釀村醅正滿缸

張以寧 十五首

以寧字志道古田人元末官翰林學士承旨明  
初例徙南京召為侍讀學士三使安南道卒有

翠屏前後集

陳廷器云學士詩沉鬱雄健者可追漢魏清婉俊逸者足配盛唐徐子元云志道高雅俊逸超絕

明畛翠屏千仞可望不可躋王元美云學士韻語亦健氣格少完穆敬甫云翠屏健翻凌風急疾無前

詩話承旨重峰送別一篇仿太白可稱合作李方伯楨題雙燕圖寄人詩云君家吟谿北我家郡北西君家梁間燕我家梁間栖周尚書忱送



人詩云我家白沙渚君家桐江頭我家門前水亦向桐江流當皆從此出可是作膾炙當時

### 送重峰阮子敬南還

君家重峰下我家大溪頭君家門前水我家門前流我行久別家思憶故鄉水况乃一作何况故鄉人相見六千里十年在揚州五年在京城不見故鄉人見君難為情見君情尚爾別君奈何許送君遽不堪憶君良獨苦君歸過江上為問水中魚別時魚尾赤別後今何如

### 林志尹秋江漁父圖

江風搖柳雲冥冥小艚釣歸潮滿汀賣魚得錢共秋酌白酒船頭青瓦餅樵青勸酒漁童舞擊甌唱歌無曲譜船前野鴨莫驚飛我有竹弓不射汝

子別黃巖十又六年謏焉德薄父老當不復記然區區常往來於懷也如晦上人來見語亶亶不能休別又依依不忍釋予不知何也賦此以贈

朗公相見廣陵春自云家世黃山人老夫疇昔黃山客江海見之情轉親坡陀石上曾波雪遍海蓮峰白於月新詩句句鬪清妍高誦長風動疎樾清晨言別索題詩我衰詩減黃山時春潮日夕海門去歸報山中耆舊知  
題海陵石仲銘所藏淵明歸隱圖

昔無劉豫州隆中老諸葛所以陶彭澤歸興不可遏凌歊讌功臣旌旗蔽輻輳一壺從杖藜獨視天壤闊風吹黃金花南山在我闥蕭條蓬門秋穉子候明發豈知英



雄人有志不得豁高詠荆軻篇竦然動毛髮

題句容同林景和縣尹子尚規登僧伽塔賦

嗟我崇明塔拔地一千丈我攀青雲梯倏到飛鳥上微  
風韻金鐸初日麗銀牕維時十月交葉脫天宇曠羣山  
東南奔平川疊波浪雲間三茅峰園立儼相向碧瓦浮  
鱗鱗茲邑亦云壯雞鳴四關開攘攘異得喪塔中宴坐  
仙憐汝在塵埃古時登臨人今者亦何往俯觀世蜉蝣  
仰歎彼龍象乃知崑崙巔可以小穹壤同游皆雋英超  
遙寄心賞霜飈天際來毛髮諷森爽太白去千年吾何  
獨惆悵

嚴州大浪灘

東來亂石如山高長江斗瀉湍聲豪蛟鼉奔走亡其曹  
青天白雲揚洪濤舟子撐殺白木篙長牽百丈嗟爾勞  
側身赤足如猿猱舟中行子心忉忉山木龍從杜鵑號  
夜飲醉歸贈王伯純是日王德容程子初同飲

歲云莫矣客不樂青雨亭前翫孤鶴城頭愔愔雲下垂  
竹外騷騷風微作亭中王郎風格奇愛竹愛雪仍愛詩  
開尊酒好客更好坐中王程俱白者紅爐照閣生春霧  
詩思騰騰天外去玉姬舞倦迴風來吹倒三山見瓊樹  
馬蹄蹴響客歸時留我更盡金屈卮塵空祇覺乾坤白  
飲醉那知賓主誰坐聞一聲兩聲折攜燈起看竹上雪  
瑤華翠色森陸離人影燈光兩清絕却歸覓紙醉自題



烏啼古寺風淒淒明年此夜知何處興發還應訪剡溪

題馬致遠清溪曉渡圖

致遠廣西憲掾子琬從子學

今晨高卧不出戶歲晏黃塵九達霧美人遠別索題詩  
眼明見此清溪之曉渡溪旁秀林昨夜雨落花一寸無  
行路歌欄桃葉人斷腸艇子招招過溪去紅日青霞半  
晦明白雲碧嶂相吞吐詩成君別我亦歸此景宛是經  
行處我呼九曲峰前船君帆正渡瀟湘渚鴈去冥冥紅  
葉天猿啼歷歷青楓樹是時美人不相見我思美人美  
無度美人之材濟時具我老但有滄洲趣他日開圖思  
我時溪上春深采芳杜

送同年江學庭弟學文歸建昌

白髮江夫子青雲信獨稀故人長北望令弟又南歸庭  
樹烏先喜江帆鴈共飛東湖春柳色到日上君衣

泊河頭水長

客路春將晚征帆日又曛深山昨夜雨流水滿溪雲渡  
黑漁舟集村空戍鼓聞故園頻夢去植杖已堪耘

寄廣西參政劉允中

重臣授鉞殿南邦五月旌旗過上江青帶碧簪環畫省  
綠沉金鎖護油幢峒丁萬笠春耕野海估千帆曉渡瀧  
銅柱南邊相憶處尺書難寄鯉魚雙

杭州歌

西陵渡口潮水平十五五放舟行樓中燕子慣見客



不怕渡頭津鼓聲

泊沽頭

楚客歸心河水流三更月暈長年愁沙河雨漲催開閘  
半夜櫓聲無數舟

有感

馬首桓州又懿州朔風秋冷黑貂裘可憐吹得頭如雪  
更上安南萬里舟

遇故人胡居敬臨江府送至新淦

翠竹蒼松映白沙清江西畔是君家明年歸路重相問  
分食東陵五色瓜

劉三吾四首

三吾初名如孫字坦甫茶陵人元末提舉靖江

學洪武中用薦除左贊善陞學士三十年主會

試以多中南人坐罪戍邊永樂中卒有璫署春

坊北園知非化鶴正氣等集桐江俞蓋知茶陵

合為坦坦齋集

學士老於文學典司文章當宿老凋謝之日朝廷大制作皆出其手其詩文膚棘不

中程度

詩話學士元之故老其詩雖不中程足補庚申外史當張士誠在吳海運阻遏元主以御酒龍衣請之不得及蘇州既平學士賦詩云姑蘇自王亦豪雄藩屏東南一旦空種稻祇今誰阻遏海門元與直沽通又云吳中既失無門戶海道長驅有舳艫蓋猶覲元之未亡其云廉藺同心如結好蜀吳異地豈俱亡則有感羣雄之失策至云萬年圖籍來江表一曲琵琶度塞門斯與宋文恪過元故宮詩並其悽切矣

錢周左丞

從戎江漢亦多年又領王師過極邊已展名公新土宇



載開馬援舊山川諸生俎豆陳兵後父老壺漿拜馬前  
最是老儒淹滯久乞將骸骨早歸田

次蔡元禮過洞庭

翠湖渺渺共天寬過客登臨足解顏兵後已非前殿閣  
望中仍是舊江山涼雲隱映波光裏壞棟欹斜樹杪間  
欲向黃陵懷帝子鷓鴣啼處雨斑斑

寄家

離別家山已數年故園桃李想依然東風客外歸心切  
落日雲邊望眼穿龍虎衛前花夾道鳳皇臺畔水連天  
丁寧為護溪邊石留取歸來繫釣船

墨竹

奎章閣老天邊字薊北山人霜後枝想見披圖明寫處  
循籬看罷落花時

魏

觀

七首

觀初名已孫字杞山蒲圻人洪武初就徵授平  
江州學正遷國子助教歷兩浙都轉運使入為  
起居注進太常卿翰林侍讀學士遷國子祭酒  
尋兩知蘇州府事坐法死有蒲山牧唱

詩話明初循吏政教兼行稱蘇守魏公其修府學則宋景濂記之舉鄉  
飲酒禮則王常宗述之乞言養老賓饌有儀三代以後不多見也其五  
言古詩念切民瘼纏緜悱惻不減元道州近體亦清脫可誦當日高皇  
游觀上苑名與危素宋濂詹同吳琳同宴奉天門東紫閣謂曰前日送  
卿還今日與卿飲何其樂也命各賦詩紀之亦稱殊渥矣  
乃緣誣善之人一言坐以慘法甚矣君恩之不可恃也

大同江口舍舟而塗抵樊昌四十里紀實



扁舟畏風濤上馬遵大路馬喜大路平騫然欲馳騫手  
疲兩足痛縱逸恐顛仆呼奴執其轡控馭使徐步前村  
望煙火稍遠得農扈蔬筍兼可求午膳當不誤少頃聞  
病翁喚出蓬頭婦婦出拜且言窮苦日難度夫遠克民  
兵兒小當遞舖翁病經半年寒餒缺調護軍需未離門  
活計不成作荒山要收絲荒畝要輸賦誅求里長急責  
罰官府怒近來點弓兵拘貧放權富迫并多逃亡蒼黃  
互號愬左右三五家春深失耕務紛紜下牌帖勾捉猶  
未杜所言盡真悉俾我心駭怖茲行事諮詢拯恤懼遲  
暮州縣嗟匪才瑣屑誠可惡喪亂民瘼深君王重憂顧  
所以諭旨勤赤子相託付民為邦之本綏撫在完固胡  
為重剝剝上德阻宣布明當抗封章為爾除巨蠹

建德縣三十韻

乘舟至建德頗愛山水清山水雖可愛人煙苦凋零種  
麥當縣前迂徑入縣庭瓦礫存故基小小才有廳父老  
匍匐來形影何伶仃再拜泣且言弊邑頻遭兵大則吳  
楚交陳畢張小則侯許征阻兵者二人逆彼族必夷順此身必刑逃

者凍餒連竄者疾疫并所剩無幾家家戶無全丁爰從  
甲辰秋始見官府明令簿來撫綏曲盡父母誠流離漸  
懷歸沈疴漸蘇醒田萊固多荒未免賦役徵里長紛竝  
緣科需取餘贏語意殊可憐推言慰其情去歲郡守朝  
綸音細丁寧民為邦之本本固邦則寧今而重傷殘救



明言卷三  
恤誠在卿譬猶澗中魚魚樂澗欲盈又如水載舟水激  
舟必傾此道垂昭昭卿等當力行軍乏捐冗條力役止  
繕營治則待以寬罰則裁以輕耕稼勗有時教養資有  
成苟或負所期憲度亟爾懲懇懇數百言官庶曾共聽  
矧是半月餘捷音下三城疆土益廣遠禮樂逾作興於  
叟宜勉旃行將慶昇平

次韻陳廉使見寄

三月雰雰雨曾無兩日晴旅懷常寂寞佳節負清明野  
樹暮雲合山溪春水平彭郎有音信處處避回兵

寧國溪上

繆鞞山環水沿洄水繞山鳥啼山翠裏人語水聲間  
茆屋連溪塢松舟繫淺灣村翁驅犢去溪女得魚還

遂安舟中

溪徑斜斜入柴門側側開一牛臨水立雙鴨避舟迴  
病眼青山豁歸心白髮催何因蕤浦上野老共傳杯

都昌懷舊隱

江霧仍爲雨山花故作容秋風餘鼠雀寒水落魚龍慄  
慨心雖壯羈棲力已慵白雲蕤浦上悵望最高峰

夜宿江夏水驛將往衡湘留贈親友

茆屋江聲合松舟月色遲把杯頻改席翦燭共題詩攬  
瑟清湘夜聞簫赤壁時美人千里外迢遞寄相思

吳伯宗一首



伯宗名佑以字行金溪人洪武辛亥初開科帝親擢第一授禮部員外郎歷武英殿大學士尋降檢討有南宮使交成均玉堂四集

詩話閣老首科狀頭自後西江人物繼起於是有狀元多吉水朝士半江西之諺予嘗購得是科會試錄就試者一百八十九人中式一百二十人浙江三十一江西二十七福建二十二山西一十三北平六河南廣東各五陝西四山東三廣西高麗各一直隸止二人考宋景濂會試錄稱先是京畿遵行鄉試中程式者七十二未及貢南宮上求治之切皆採用之蓋庚戌京畿所取士先會試而授之官矣

### 題李氏棲碧樓

唐有謫仙人風骨特高妙晚愛棲碧山閒心付登眺桃花與流水目擊領其要遐觀窮有象幽討入無竅不知誰相問但覺遺一笑聲落天地間松風紫鸞叫諸孫企高躅異世頗同調瑤樓睇空青銀牕生光耀予亦愛其人臨風劃長嘯

### 危素 四首

素字太樸金谿人仕元至翰林學士承旨洪武初授翰林侍講學士兼弘文館學士謫佃和州有雲林詩集

詩話太樸居大都鐘樓街明師入燕走報恩寺將入井僧大梓挽出之謂曰國史非公莫知公死是死國史也由是不死兵垂及史庫言於主帥輦而出之累朝實錄得無恙然元史成日曾未獲與筆削近亦以國史自任乃  
公故天有意阨之邪太樸說學齋文傳鈔都非足本  
雲林集係葛邏祿易之所編前有虞伯生送行序

### 梁國狄文惠公新廟詩

大江從西來萬里流湯湯維唐社稷臣勲業載旂常天子在房陵女后御明堂晨聞牝雞鳴腥聞溢穹蒼猗公



秉忠義耿耿立廟廊周旋極黽勉論議忽慨慷載御卷  
冕歸宗社燧有光豈徒保國祚實欲扶天常雲孫江州  
牧思宮廟薦烝嘗豆籩孔嚴潔絲石載鏗鏘再拜久屏  
息低徊想忠良作歌勸臣子百代踵遺芳

泊宮步門

人歸石城邊鳥沒白沙尾秋風涼蕭蕭波靜月如洗水  
鳥栖不定半夜猶飛起

後買琴歌為鄧旭甫作

鄧敦好琴如好色十年買琴不可得南城縣裏客攜來  
百鎰兼金君不惜竹林踞坐江盈盈臨江三奏魚龍聽  
蕭森巖壑秋氣肅洶湧天地霜風清商聲洋洋羽聲苦  
月墮寒光君罷撫餘音寄意愁人心別思蒼茫正如許  
為余再控白玉絃長謠楚語招飛仙招飛仙安得見獨  
立乾坤淚如霰

期馮祥甫不至

寒山壓樓三日雨風卷崩雲亞高樹山人無事不下樓  
空谷寂寥誰與語平生故人大馮君約之不來歲聿暮  
歲聿暮君何之側聞他日撫州去又恐促駕江東歸梅  
花千樹化為雪寄贈惟有長相思

明詩綜卷三



明詩綜卷四

小長蘆 朱彝尊 錄

練川 張大受 緝評

劉 崧 五十首

崧字子高泰和人明初以人材舉授兵部職方司郎中遷北平按察司副使坐事輸作京師尋放還徵拜禮部侍郎署吏部尚書請老許之復

名為國子司業有槎翁集

宋景濂云子高天賦超逸之才加以稽古之力雕肝琢髓宵吟

夕詠而又得師友之資江山之助五美云備詩於是乎大昌凌厲頓迅鼓行無前緩急豐約隱顯出沒皆中繩尺 劉仲修云子高日課一詩多至千餘篇遭亂崎嶇轉側二十餘年不為少折既貴澹然如布衣北平去家五千里惟一僮侍側已復遣還哺時吏退獨處一室據几吟詠夜分不休其年愈老思愈壯詩愈工時豫章萬白大梁辛敬襄城楊士弘秣陵周澗鄭大同皆以歌詩自雄子高與之馳騁上下名聲相埒



王元美云劉子高如雨中素馨雖復嫣然不作寒梅老樹風骨 胡元瑞云國初吳詩派昉高季迪越詩派昉劉伯溫閩詩派昉林子羽嶺南詩派昉孫仲衍江右詩派昉劉子高五家才力咸足雄據一方先驅當代第格不甚高體不甚大耳 顧文玉云子高虛澹不墮習氣 靜志居詩話子高句鏤字琢頗具苦心惜其體弱局於方寸不能展拓於唐近大曆十子於宋類永嘉四靈於元最肖薩天錫

東方行

東方閃閃啼早鴉美人愁眠隔窗紗桐華樹下人來往  
銀牀轉轡夢中響

姑蘇曲

姑蘇城頭烏夜啼姑蘇臺上風淒淒芙蓉露冷秋香死  
美人夜泣雙蛾低銅龍咽寒更漏促手撥繁絃轉江玉  
鴛鴦飛去屨廊空猶唱吳宮舊時曲

過南州訪友同王子與羅子理分韻得滿字

連阜衍平皋深林闕虛館揚襟暢遐思散帙延清款溪  
蓴花纂纂田黍實纂纂逕迴阡彌永水落澗初滿載欣  
秋稼登矧愜人事罕欲往悲曠塗言歸理修曠

歲暮南歸留別蕭翀

旅寐不能旦披衣坐牀帷屋角曉色動鳥鳴已多時起  
坐出庭際雲物正華滋殘雪未盡消羣山鬱參差即此  
念故園焉得不懷思矧屬歲運周返駕固其宜理策望  
前路揖君從此辭窮檐有穉子但訝歸來遲

辛丑正月二十二日述志

經年掩扉卧迹與城市遙誰為拔茹計乃以仕見招本  
昧平生素敢勞中道要公檄臨我門戒命在夕朝九江



明詩紀卷四  
今雄州邁往方迢迢有母誰與居念之中心焦起揖謝  
來客我何希市朝澹然一室內宴坐風寥寥

游三華山

龍門兩山負一水下迴繞蒼峽忽中開飛橋出林杪盤  
盤石磴引幕幕松林宵危闌正西挂層閣復東繚樹暗  
盡含雲花明忽聞鳥懸厓傍架棧鑿石潛通突早聞三  
仙人棲化迹已杳常疑雲月上顏色靚清皎丹井舊時  
深朝真亂來少荒壇翳霜兼虛館闕叢篠凝神觀衆妙  
屏迹謝羣擾懷賢嘅重憩振翼思遠矯佳境能娛人何  
因致清醪

早行霧中過田家失道

我行煙霧中不復辨原陸幽幽聞雞犬隱隱見松竹田  
家迷遠近阪路有崎曲已覺瞻望勞誰云往來熟

舍弟往三坳嶺尋鱣子日夕未歸坐候林下

西林已雞棲北澗復蟲響沉沉四山暝寥寥一星上時  
危劇鍾情期逝勞紆想悵立此溪陰欲休未能往

江干州居

江干愜幽屏草扉亦常關晚塗斷歸人虛市見寒山林  
木變冬候絲綠忽已殷鳴鳥相因依孤雲時去還唐虞  
既云遠慨此時獨艱四體豈不勤我髮日已斑遨遊千  
載上偃仰一室間樂詠古人書庶幾無醜顏

和答蕭國錄八月十一夜對月有懷之作



明詩卷四  
林塘澹清華庭宇豁虛朗露井波澄輝風林葉交響高  
言倡令德孤吟振遐想亭亭江上月肅肅雲鴈往美人  
浩前期令節延遠望池魚既堪綸旨酒亦可釀永懷契  
天游庶以會心賞宇宙本達觀如何較銖兩

題秋江待渡圖為蕭學士賦

小航衝風岸將及行人下馬沙頭立水闊雲深野渡閒  
天寒日暮歸心急人生行役安可休到江路盡還通舟  
誰能裹足山中老不識風波一日愁

題余仲揚画山水圖為余自安賦

金華仙人余仲揚筆墨蕭疎開老蒼昨看新圖湖上宅  
烟霧白日生高堂層峰上蟠石皜皜絕島下瞰江茫茫

長松竝立各千丈間以灌木相低昂松下上人坐碧草  
秋影忽落衣巾涼囊琴未發絃未奏已覺流水聲洋洋  
赤城霞氣通鴈蕩巫峽雨色來瀟湘誰能千里坐致此  
欲往久歎河無梁風塵漲天蔽吳楚六年悵望神慘傷  
玄猿苦啼巖北樹白鴈不到江南鄉赭山焚林絕人迹  
如此山水非尋常此圖本為自安寫亦感同姓悲殊方  
幽軒素壁泉聲動對此令我心為狂何由捫蘿逐麋鹿  
振衣直上雲中岡登臨一寫漂泊恨長嘯清風生八荒

題溪山春曉圖寄贈蕭翀

土山戴石石角傾偃樹雜出如幢旌青天微茫曉色動  
雨氣合沓千峰晴野橋西邊有村路之子鳴鞘踏雲去



重巖花發似聞香  
隔水鶯啼不知處  
東南連年飛戰塵  
如此山水何清新  
石田到處長荆棘  
豈有荷耒春耕人  
我昨西游登武姥  
手抉雲霞望仙府  
把酒忽逢東海生  
醉臥溪南紫蘿雨  
紫蘿陰陰覆巖扉  
十日尋幽行未歸  
雲峰流泉半空落  
六月飛雪霑人衣  
拂衣歸隱知何日  
却對畫圖心若失  
不聞流水渡溪還  
時見浮雲向山出  
懷哉桃花修竹林  
江海秋高煙霧深  
豈無耕釣在田野  
誰識悠悠沮溺心

寄曾郁文短歌

澄江水向東流  
流向東昌江上頭  
我有故人在江上  
十年不見增煩憂  
白沙水聲寒活活  
黃巖雲氣凝清秋  
豈無沙棠柹吳女  
謳可載酒同遨遊  
狂風吹山波浪惡  
使我不得回輕舟  
翩翩雲中雙飛燕  
銜書寄我頻留戀  
書中展轉道深情  
但恨相思不相見  
春燕飛來秋復歸  
報書不遣壯心違  
碧蘭紫蕙何由采  
即恐蕭條霜露稀

題曾郁文所藏山水小景

隔溪望見林間屋  
沙漱陰陰俯羣木  
溪流合處一橋孤  
春雨來時萬山綠  
江南此景真可憐  
朱家筆意誰能傳  
却憶故廬珠浦上  
短籬長繫釣魚船

題山水畫軸

瀑布雙垂下屏風  
九疊張波光混彭蠡  
山勢似潯陽松  
塢棲茅屋楓林帶石梁  
扁舟如可具吾意在滄浪



張氏溪亭雜興 二首

草閣經秋靜紫扉近水開霜林收橘袖風磴坐莓苔釣  
艇寒初放樵歌晚獨回城南車馬地欲往更徘徊  
寒霧依山斂晴沙與岸頽林塘無路入窗戶有時開野  
客鈔書去鄰翁送酒來幽期在蘿薜莫遣暮鐘催

題陽靈洞

仙宇何年闢靈泉盡日聞石門通別殿木棧倚高雲鸞  
鳳時來下獼猴近作羣春風城郭暮煙霧正紛紛

題彭氏背郭茅堂圖

日薄金華嶺雲深白石塘茅茨元背郭水竹自成鄉圖  
畫看逾好登臨興不忘門前雙杏樹葉葉是秋霜

過龍灣五王閣訪友人不遇

野橋秋水落江閣暝煙微白日又欲午高人猶未歸青  
林依石墻虛館淨紫扉坐久思題字翻憐柿葉稀

再懷伯兄子中時有同客興國者從間道先歸兄  
以道阻後期不果

貧賤輕離別艱危味死生獨違同里伴仍阻異鄉程愛  
想深山憩愁聞間道行幾時秋樹下慰此淚縱橫

玉華山

翠巘千峰合丹崖一逕通樓臺上雲氣草木動天風野  
曠行人外江平落鴈中傷心俯城郭煙雨正溟濛

題李志謙書舍



溫家亭子三江口坐對東風  
兔子寮錦石白沙寒歷歷  
碧雲紅樹晚蕭蕭簾虛易覺  
天光切衣潤常疑霧氣飄  
賴有石門支遁在題詩長日  
出溪橋

舟次樵墩憶故人鄭同夫

浦口維舟日欲晡柳村桑塢  
帶縈紆獨尋古道黃埃滿  
忽憶故人秋興孤螺蚌儘供  
溪女拾雞豚偏稱野人呼  
西山隔水清如玉誰與題詩  
送酒壺

奉同曠伯達周叔用徐仲孺登  
秋屏閣是日聞淮郡有警風  
沙黯然賦呈萬德躬孫伯虞諸  
君子

古刹蕭條隱石根荒城高下帶  
沙墩斷雲南鴈日初出  
曠野北風天正昏羽檄屢傳淮  
甸急龍艘猶滯海門屯

湖山不盡登臨興回首鄉園獨  
愴魂

入城

江水依然抱石磯獨行空感舊  
游非晚山當戶日初落  
秋草滿城人未歸田鼠引羣穿  
井出山雞求食傍簷飛  
向來車馬東門路忽憶朋游淚  
滿衣

漫興

山下碧溪渾欲平溪邊春事總  
關情定巢新燕忽雙過  
隔水雛鶯時一鳴凍入秧畦愁  
近雪先涵風浦愛新晴  
南園草綠無人到應是滿林春  
筍生

客情

清明已過寒雨稀客情物色共  
依微庭前幽草忽如積



江上落花渾欲飛，風雲慘澹隨長戟。塵土蕭條上短衣，雲亭江上麥田熟。昨夜月明還夢歸。

將歸南平發舟戲賦

梅演山前聞鴈來，珠湖渡口放船回。晚雲出嶺作疎雨，秋水滿江生綠苔。故里風煙頻入夢，中年世事獨興哀。飄搖莫戀詩千首，斷送深憑酒一杯。

秋日承廬陵曲山蕭壽春過林居臨別賦贈

秋露滿園桑葉飛，遠煩江上問柴扉。青山古道獨行晚，白髮故人相見稀。細雨高原禾黍熟，斜陽疎樹橘橙肥。殘年甚欲留君住，何事驪駒只賦歸。

早春燕城懷古

二首

金水河枯禁苑荒，東風吹雨入宮牆。樹頭槐子乾未落，沙際草芽青已黃。北口晚陰猶有雪，薊門春早漸無霜。城樓隱映山如戟，笳鼓蕭蕭送夕陽。

宮樓粉暗女垣欹，禁苑塵飛輦路移。花外斷橋支顛顛，草間壞壁綴罍酒。坊當戶懸荷葉兵，壘綠渠插柳枝。不見當年歌舞地，空餘松柏鎖荒祠。

陶皮石室

自注即今北巖古陶皮二仙修煉之所。天將雨則巖竇有泉出焉。禱者嘗以爲候，舊名觀音巖。今正之。

北巖極崿訝三面，環絕壁聞有山。雨來石泉先暗滴。

峭壁蘭

巖石下陰陰，猗蘭綠如翦。花發人不知，秋香入苔蘚。

題李唐牧牛圖

二首



天寒放牛遲野曠風獵獵獨來長林下吹火燒山葉  
日夕山氣昏獨歸愁路遠猶戀草青青遲回下長阪

江上

沙觜微波漾綠蘋山頭落日駐紅輪依稀燈火楓林鼓  
岸上人家賽水神

步月

乘涼步月過西鄰草露霏微濕葛巾一逕竹陰無犬吠  
飛螢來往暗隨人

八月十一日自水南渡江道金華過北巖訪蕭鵬  
舉是日雲陰掩冉不見日色道中賦絕句

八月棠梨露葉紅荒陂古水湛青銅秋風依舊巖前路

高下寒山落日中

正月十九日

金魚洲下放船開華石潭邊看雨來愛殺南天雙白鷺  
青山盡處却飛回

題枯木竹石

二首

木葉欲脫天雨霜竹枝乍低風已涼三湘落日流波白  
行子繫船思故鄉

平沙竹樹晚穆穆楚客維舟近峽南忽憶微雲將雨過  
滿林秋色照江潭

題超上人墨菊

露香秋色淺深中青蕊黃花自一叢最憶南園微雨過



短籬扶杖看西風

蒼石峽中見道人菴居隔水山花盛開

蒼石峽中花藥欄舊時草屋傷巖安道人去後松橋斷  
縱有花開隔水看

題三岡寺

石橋流水帶人家紫殿春陰閣岸沙啼鳥數聲山雨歇  
門前落盡白桐花

寒夜

馬齧枯菱寒夜長風如箭鏃射陰房不知門外三更雪  
誤起開門看月光

送別叔銘出順承門

送客出城秋已涼太行南上楚天長順承門外斜陽裏  
蕎麥花開似故鄉

望漢獻王陵

單家橋下雪橫水草樹連雲掠凍鷹漢業已荒河水在  
行人遙指獻王陵

高唐州道中

北風吹沙官道長兩旁楊柳間榆桑何時走馬重來此  
要看清陰六月涼

周 湏 三首

湏字伯寧江寧人明初任饒州長史陞湖廣都  
事旋擢刑部尚書降惠州經歷

周吉父云伯寧望九華詩云巖回氣如燬峰去



勢猶引  
佳句也

始發建業登龍江山祠感懷有作

去國思舊遊尋山發幽眺遙凌天門石恍對臨海嶠神  
關列雄鎮危堞抱遺廟秋陰散氛翳炎景扇餘燎天水  
遠自空雲霞近爭耀客行始多感世事紛難料同俗豈  
素懷趨時固殊調既爲達士恥復被逐臣誚行矣庶無  
欺忠信將可劬

舟中望九華山

貞履無素期勞生意恒窘誰云戒戎路曾是返初隱水  
宿淹長晷山行阻修眇縹緲對雄標噴岈發奇蘊巖回  
氣如熾峰去勢猶引刻削冠青蓮雕鏤轟丹筍堪霞上  
斑剝石乳下礪礪山鬼從文狸淵靈闕玄蜃睭言志藜  
藿未遂采芝菌即事情已悲懷賢迹俱泯潛吳媿梅福  
去汶羞閔損人德險未夷天道明可準皋蘭豈徒歇巖  
桂芳未墮歲暮山中人寤歌一作  
結言候歸軫

賽小姑廟

育秀凌華嵩標奇真淮楚陽闢啓神關陰沉開水府林  
林聚商舳淵淵聞戍鼓陳瑟會安歌傳芭紛代舞椒漿  
既芬潔桂櫂方容與日暮懷歸情含涕望修渚

黃 肅 五首

肅字子邕江西新城人元季官禮部主事自北  
平來見命仍故官陞侍郎已降郎中復陞工部



侍郎任尚書未幾出參政廣西坐黨禍死有醉

夢稟

王子充云子邕詩簡易平質一本漢魏絕去近代聲律之習

詩話尚書匣鏡一篇當是懷故主遠在沙漠而作其云夫子新好合不能思故家則刺同時佐命之臣也

短歌行

來日苦少去日苦多人生不滿百痛當奈何不如沽美酒與君長笑歌峻坂無停車急川無停波人生不滿百當復奈何來日苦少去日苦多

詠懷 三首

少壯好游覽不知中道憂方茲懷故土眷此成淹留員闕蔽朝暉玄雲陰以浮徘徊當永夕嫵婉將焉速棲鳥翔不息鳴蟲亦啾啾人生無定止卒歲何能休

流水日夜流厚土何不盈人生自不已四運迭相承達士識物化昧者徒營營蕩蕩晨風來悠悠天宇清會當撥塵務聊復從吾生追呼心所歡置酒坐中庭忘言勿復辨觴盡還復傾

匣鏡三十年塵暗不復治停餐且不寐所思知為誰蕩子不復返眇在天一涯綻衣終當組道遠何能持明明天邊月三五入中閨念與子歡愛不得同光輝寤言相與共既覺將何依

客中書懷

竹裏山雞啼未休江南二月景如秋半簾花雨寒侵袂一片江雲晚倚樓亂世青春如過夢少年華髮忽盈頭



故園動是經年別滿眼干戈添客愁

牛諒 三首

諒字士良東平人流寓吳興以秀才舉除翰林  
典簿使安南還擢工部員外郎歷禮部尚書降  
主事尋復任免有尚友齋集

郁伯承云弇州別集以公從主事為尚書收入超遷之例子檢科試考有掌卷官工部員外郎牛諒又宋學士慶成宴詩序有工部侍郎牛諒是由員外侍郎而至尚書亦循序而遷也公優於文學嘗與唐應奉肅有丁未九月聯句蓋國初才士鄭芷畦云實錄洪武七年十二月癸丑罷禮部尚書牛諒官諒初為禮部尚書以怠職降為本部主事未幾復為尚書至是又以不任職罷是諒為工部員外侍郎皆在洪武七年禮部尚書之前弇州別集謂公從主事為尚書收入超遷之例似與實錄及科試考慶成宴詩序不合

詩話尚書流寓吳興時過橋李與鮑恂仲孚丘民克莊張翥翔南王綸昌言聞人麟彥昭曹睿新民徐一夔大章尤存以仁及呂安坦來志道周棐常真釋智寬等集郭西景德寺攜酒賦詩其在南京則與唐肅處敬林公慶孟善陳世昌彥博徐一夔大章張翥翔南朱升允升會飲聯句及同張以寧志道使安南志道賦長句以贈有云更喜清詩慰遲暮蓋當日風雅之林每屈一指不徒以功名顯也又在元時中甲午大魁亦見志道詩句

西郭憩景德寺分韻

靈湫閔白龍古殿敞金粟僧歸林下定雲倚巖端宿伊  
余陪勝引於此避炎酷息陰悟道性習靜外榮辱坐石  
飛清觴每歎白日速別去將何如留詩滿青竹

紅梅

隴頭人未來江南春幾許惆悵玉簫聲吹落胭脂雨

画梅

梨花雲底路參差折得春風玉一枝南雪未消江月曉  
欲從何處寄相思



朱夢炎 一首

夢炎字仲雅進賢人元進士入明為國子博士  
遷翰林修撰出為浙江按察司經歷轉山西行  
省員外郎入為禮部員外郎擢本部侍郎陞尚  
書

錢塘西湖

萬戶煙消一鏡空水光山色畫圖中青樓燕子家家雨  
錦浪桃花岸岸風櫂轉舞衣凝暮紫簾開歌扇露春紅  
蘇公堤上垂楊柳尚想重來試玉驄

楊訓文 二首

訓文字克明潼川人元淮海書院山長遇亂居

江都明初徵為起居注兩遷左司郎中丙午年  
自太常卿知湖州移知汀州歷禮部尚書改戶  
部出為河南行省參知政事卒

詩話元詩華者易流於穢貫酸齋輩是也清者每失之弱薩天錫等是也明初若劉子高蘇平仲楊克明其源皆出於天錫質羸之恨諸公不免

贈友

與子分攜後星霜二十年重逢驚老大惜別更留連花  
落春江雨鷓啼綠樹煙幽懷浩難寫愁隨酒尊前

寄石仲文

故人別後復如何不寄新詩到薜蘿賈誼書成何日上  
張衡愁比向時多江城木落霜連地澤國天寒水不波



重約明年秋八月紫薇花底共鳴珂

滕毅 三首

毅字仲弘鎮江人以儒士徵授起居注擢吏部尚書出參政江西

詩話尚書詩不多傳亦具風骨秋興二詩彷彿宋文恪過故宮之作

姊歸即楚王臺舊基為新城

春風夔子國落日楚王臺江遶西陵下雲從上峽來壯遊今已遂幽思獨難裁關塞猶戎馬吟邊首重回

次韻黃秀才秋興 二首

西風如水灑絺衣無數南來候鴈飛朔漠地寒收王氣岷峨秋盡斂餘暉三泉忽報金棺葬萬國同瞻玉璽歸

相見不須談往事百年耆舊眼中稀

虎戰龍爭二十秋江波日夜自東流道旁無語王孫泣天際含嚔帝子愁首蒼風煙空壁壘蒹葭霜露滿汀洲古來維有西山月永夜依依照白頭

錢用壬 一首

用壬字成夫廣德人元翰林國史院編修出為江浙行省左右司員外郎既而參平章張士信軍事於淮安陞參政歸附後授按察副使歷禮部尚書洪武元年十二月告老賜居湖州

題米敷文煙巒曉景

江上亂峰生暮煙隔江遙望水雲連西風戰艦今無數



不見米家書画船

李質一首

質字文彬德慶人元末以府掾聚兵二萬保障封川等四郡者十五年全城歸附授中書斷事遷大都督府洪武五年任刑部尚書出為浙江參政終靖江王相有樵雲集

玉臺驛亭子

春去臺空迹已陳危亭傑出澗之濱清溪繞屋可濯足好鳥隔江如喚人明月委波金潏灩青山帶雪玉嶙峋桃花流水非人世或有漁郎來問津

吳雲一首

雲字友雲宜興人洪武初授弘文館校書郎歷

刑部尚書參政湖廣奉詔招諭雲南死之

詩話尚書送李民瞻一律體格極似高季迪送沈左司詩而聲色不同未免近於土木形骸矣錄之以諗知言之君子

送李民瞻侍郎宣諭陝西

侍郎將命出金鑾道路傳呼遠近歡關內官曹迎使節秦中父老識衣冠雲開太華三峰秀水遶黃河九曲寒寄語渭川千畝竹西風還解報平安

張籌一首

籌字惟中無錫人以薦授翰林應奉洪武八年

任禮部尚書降員外郎徐子元云惟中剛健之氣未能全融而金石鏘然足洗俗樂之耳

朱中舍惠麓秋晴圖



湖上羣山卧九龍泉頭一客坐雙松定知別去還相憶  
夢入秋雲第幾重

吳琳一首

琳字朝錫黃岡人召為博士歷浙江按察僉事  
入充起居注洪武三年吏部尚書出知黃州以  
老致仕

開化道中

重岡狹路倦登臨喜見溪流華步深楊柳樹邊舟小小  
海棠花上雨沈沈一春王事過三月千里家書繫寸心  
無補盛時縻好爵不才端合老雲林

嚴震直 二首

震直初名子敏字震直因御稱其字乃互易焉

烏程人明初由糧長授河南布政司參議累官

工部尚書致仕永樂初召令宣諭山西卒於澤

州有遣興集

朱平涵云嚴公遇建文帝吞金事見吾學編名卿  
績紀二書世所尊信無有易者然文皇入京在壬

午六月而嚴公之卒即在是年九月是時但知建文帝焚死後數年漸  
有傳在西南徼者於是使胡尚書訪張選過鄭太監賞賜西域此時嚴  
公捐館已久矣今其子孫據二書請於  
所司立祠立碑不知前後迥不相及也

詩話尚書由運糧萬石長舉為布政司參議未之官留署通政司事歷  
工部尚書洪武三十一年春致仕建文元年己卯復以年老辭不與事  
帝念其任事久留住京師考遣興集中有燕集賜第之蔡心堂詩乃是  
年三月十五日事分韻者為董學士倫茹尚書瑞高太常遜志任尚書  
亨泰程都御史本立李尚書至剛鄭庶子濟黃侍郎福張尚書統高經  
歷德陽凡十有一人太常詩云偉哉尚書公致政鳴珂里賜第最幽敞

洞出京塵裏庶子詩云尚書遂休致賜第居京洛侍郎詩云司空居廟堂  
憂國騶如絲挂冠神武門賜第留京師歷歷可證而續藏書謂尚書歸老  
在里長陵以兩馬夾衣昇至京致身錄又稱靖難兵起時督餉山東皆妄也  
載攷文皇帝實錄壬午七月二十三日詔云朕居藩邸凡百姓艱苦靡



不知之數年來兵興北方之民疲勞尤甚朕所以舉義者為宗社生民計今宗社既安而北方之民未安朕夙夜不安乃命前工部尚書嚴震直戶部致仕尚書王純應天府尹薛正言等分往山西山東陝西等布政司巡視民瘼何弊當革何利當建速具奏來尚書受詔往山西是秋九月十一日病卒於澤州公解合之忠誠伯如瑞所撰嚴公神道碑無異初不聞奉長陵密詔往雲南訪建文帝也吾學編遜國表忠紀等書不知何所據信吞金為實列尚書為後死忠臣之首萬曆十九年巡按御史黃鍾疏請建祠榜曰旌忠列在祀典越數十年其裔孫祇字文昭作祠祀韓大指謂吾祖功業炳耀史冊何藉吞金一死以罔天下後世黃公欲顯吾祖適足以誣吾祖也噫文昭不欲誣其祖可謂賢子孫矣

### 棲霞真境

棲霞有真境遠在桂林間春風洞中瑤草綠桃花滿樹  
春斑斑羣峰拔地幾千尺上有樓臺耀金碧興來直欲  
一登臨王事有程留不得

### 永州舟中

瀟湘二水會零陵灘響惟聞浪作聲兩岸青山明月夜

### 画船行過永州城

朱同一首

同字大同休寧人自號紫陽山樵洪武中以人  
材舉為東宮官進禮部侍郎尋被誣得罪有覆  
瓿集

### 題画

紫陌紅塵沒馬頭人來人去幾時休誰家有酒身無事  
長對青山不下樓

丘民一首

民字克莊揚州人徙居嘉興洪武初為松江學  
官後至禮部侍郎



送友人至杭

又隨南鴈度錢唐不道他鄉是故鄉江上秋風蓴菜美  
山中春雨石田荒杜陵老去寧忘蜀江總歸來不是梁  
欲采芙蓉贈君去錦雲零落倍淒涼

秦約四首

約字文仲鹽城人徙居崑山仕元為崇德教授  
洪武初召拜禮部侍郎以親老辭歸再徵為溧  
陽教諭有樵海集

江之水寄楊鐵厓

江之水流瀾瀾蕩漾雙鳧舟涉江采蘭芷蘭芷青青露  
如洗下有一雙魴與鯉美人美人胡不來相思日暮江

風起

雜興

元冬十月交蟋蟀近我牀傷彼苕之華含英委清霜丈  
夫四方志千金戒垂堂壯日不奮迅老矣徒慨慷

紀夢簡陳簡討二首

宮車轆轤過神皋五色雲中望赭袍野膳不嫌涼餅滑

小奴花下翦春蒿

查夏重云是詩似指  
庚申君北狩時事

吳蠶入繭染春紅繅盡柔絲未論功若得君王迴一顧  
不辭白髮上陽宮

韓宜可一首

宜可字伯時會稽人洪武初徵拜御史出為山



西布政謫雲南後起為左副都御史

詩話伯時詩見滄海遺珠句如松迷鶴徑渾無路花暗簫聲不見人青天有月來今夜白髮無家度幾秋芳草東風沙上馬青山遲日柳邊鶯均有思致

### 五華山圖

五華之山山上頭俯視東海如浮漚豈無四萬八千丈  
亦有五城十二樓翠蕖影落中天曉玉柱光含大地秋  
何日相從陪杖屨西風林外一長謳

蘇伯衡 三首

伯衡字平仲金華人明初仕為國子學正擢翰林院編修宋濂以翰林承旨致仕薦以自代召至固辭賜文綺遣歸起教授處州以表箋忤旨

坐罪卒于獄有平仲集

劉伯溫云平仲詩文辭達而義粹識不凡而意不詭蓋明於理而昌

於氣也 徐子元云平仲豐腴太牢之味與藜藿自別

詩話元時進賀表文觸忌諱者凡一百六十七字著之典章使人不犯其法良善速明孝陵恩威不測每因文字少不當意輒罪其臣若蘇平仲徐大章輩是也當日有事置丘惡祝冊有予我字將謹撰文者桂正字彥良言於帝曰予小子履湯用于郊我將我享武歌于廟以古率今未足深譴帝怒乃釋可謂善於悟主矣惜未有為平仲調解者竟瘦死於獄悲夫一百六十七字者極盡歸化凶播晏徂哀奄昧駕遐仙死病苦沒泯滅凶禍傾頽毀偃仆壞破晦刑傷孤墜隳服布孝短天折災困危亂暴虐昏迷愚老邁改替敗廢寢殺絕忌憂切患衰囚枉棄喪疾空陷厄艱忽除歸擯缺落典憲法奔崩摧殄隕墓槁出祭奠饗享鬼狂藏怪漸愁夢幻弊疾遷塵亢蒙隔離去辭追考板蕩荒古述師剝革睽違尸叛散慘怨尅反逆害戕殘偏枯眇靈幽沉埋挽升退換移暗了休罷覆弔斷收誅厭諱恤罪辜愆土別逝泉陵此延祐元年十一月取定擬至三年八月寬其禁矣其字樣雖難悉避然亦玉堂視草者所宜知也

### 送陳思可主簿赴進賢任

一別十五年倏忽若昏旦相逢京城中幸脫戎馬亂宦



遊我何成鬢髮子已換留連一尊酒寂寞四門館剪燭  
聽寒雨話舊過夜半居然消百憂莞爾成一粲維子才  
且賢文采甚煥爛起從有道徵國光方縱觀謂宜真館  
閣鴻猷藉宣贊如何奉明命鈞考親吏案黎庶乃邦本  
疾痛資抑按要將遠猶敷可以小邑翫心懷簡書畏跡  
逐萍梗散席挂遇順風潮生失遠岸昨夕簪云盍今朝  
袂還判後會復何時臨岐重嗟歎

周伯寧春晴江岫圖

尚書襟懷絕瀟灑揮毫往往凌董馬平生一筆頗自珍  
數尺新圖為君寫齊山遙接吳山青碧波萬頃孤帆征  
東風綠遍汀洲草總是岐亭離別情一向江南一江北  
離情浩蕩嗟何極正如江上之碧波縱有并刀那翦得  
當時已足令心愁如今况復隔羅浮掩圖却上高臺望  
但見遠海連天流暮歸朝出誰與侶蜃霧蠻煙結悽楚  
木棉花落鸚鵡飛苦竹叢深鷓鴣語

絕句

落葉滿衡門蕭蕭風雨夕一燈溪上明何處獨歸客

唐 肅 六首

肅字處敬會稽人元末官嘉興儒學正洪武初  
召修禮樂書擢應奉翰林文字兼國史院編修  
以疾失朝罷歸里謫佃濠卒有丹崖集

戴叔能云  
處敬詩文

澹而華質而麗直而不倨簡而不齷 蘇平仲云  
應奉律詩步驟盛唐 顧玄言云翰林思頗清僻



詩話處敬文極為危太樸宋景濂戴叔能申屠子迪所許詩與謝僉事  
原功齊名稱會稽二肅其為學正也盡挈其家居樵李徐幼文送以詩  
云路出三江外程淹一日間高季迪詩云舟重全家去詩多一路題處  
敬亦有留別詩存丹崖集中當元之季浙西歲有詩社而濮市濮仲温  
豐於贊集一時名士為聚桂文會以卷赴者五百人請楊廉夫評其優  
劣於是紀風土者目為樂郊及楊完者亂州無完郭然繆同知思恭德  
謙猶招羣彥集南湖與會分韻者一十有四人越二年曹教授睿新民  
復集諸公於景德寺亦一十有四人是時聞人麟彦昭葉廣居居仲金  
綱子尚潘著澤民劉堪子輿咸有詩名吳鎮仲圭居魏塘貝瓊廷琚居  
千金圩鮑恂仲孚居郡城之西溪郁遵子路居商陳村四方避地者温  
州陳秀民庶子居竹鄰巷閩人卓成大器之居甌川江陰孫作大雅居  
南湖崑山顧德輝仲瑛居合溪天台徐一夔大章居白苧里會稽江漢  
朝宗居濮院桐廬姚桐壽樂年居海鹽之峨溪而河南高遜志士敏東  
平牛諒士良江都丘民克莊錢唐陳世昌彥博建德張翥翔南皆來僑  
居四明周棊以陸宣公書院山長留居黎林日以文酒唱酬詩成輒鏤  
板鏡壁聞者傳為勝事今也流風遺俗未有存者錄處敬詩因附及之  
欲尋舊蹟不勝海  
桑岸谷之感也

銅井迎送龍辭 二首

伐鼓子吹簫迎我龍兮山椒龍之都子何所泉淵淵子

石為戶叩龍車子乞靈龍不出子我心若醒我心若醒  
子龍寧勿聆

我叩龍兮龍卹風旋波子龍出龍之出子福子變旱熯  
子為澍龍為澍兮我弗饑返山椒兮雲旗風冷然兮龍  
歸

題張孟兼所注謝翱西臺慟哭記後 有序

謝翱字皋羽文丞相館客丞相既薨皋羽哭之  
於子陵釣臺作慟哭記今金華張子為之解云  
宮中六更初罷鼓藍田洗玉沉厓浦廬陵忠肝一斗血  
去作燕然山下土桐江水落秋日頽有客歌上嚴先臺  
石根敲斷鐵如意萬里北魂招不來西風又涸灤河水



故老寥寥知有幾珍重睢陽季葉孫箋簡能裨兩朝史

過清流關呈同行者

關在滁州即宋太祖以周師擒南唐將皇甫暉姚鳳之地

前月與君南入關五更月出山霧寒行人畏露復畏虎  
十十五五同躋攀今日與君仍北去赤日黃塵汗如雨  
息肩共憩石浮圖欲喚天風便高舉當時宋祖百萬兵  
擒暉戮鳳關險平百年戰爭幾人守空餘蔓草啼鶡鷄  
關南遙遙白雲遠關北茫茫盡平坂回頭野燒起荒田  
驅車度關愁日晚

題趙仲庸所画滾塵馬

匹馬滾塵誰所寫天水王孫最文雅王孫系宋不系唐  
那識唐人與唐馬左輔白沙白于雪四十萬頭名各別

廄中此馬帝常騎一色紫霞名叱撥奚官似隸王毛仲  
左手執刷右持鞚沙平草暖不被鞍芻豆飽來筋力縱  
翻身倒豎踣鐵蹄霧尾風駿亂不齊元是滇池赤龍種  
猶思躍浪涌春泥太平無事征戰少青絲絡頭可終老  
不似交河赴敵時夜蹴層冰僵欲倒

抵瓜洲

春雨春潮撼客懷舟中十日九陰霾江名天塹元通蜀  
地入瓜洲始接淮我笑銀杯能羽化君看寶劍或塵薶  
明朝又過揚州去無復瓊花舊觀牌

韓守益一首

守益字仲修石首人明初以儒士攝教宜都擢



廣西按察僉事入為河南道御史改春坊中允  
有樗壽橐

詩話中允無詩名七言如幽禽曉聚岸花動錦鯉春肥溪水溫椰葉雨晴鸚鵡語木棉風暖鷓鴣飛隔簾花影散棠棣何處鳥聲啼栗留具有

過九江

夷險休渝節勤勞莫問家暮船維柳樹春水泛桃花廬  
阜依霄漢江州對渚沙多情白司馬曾此賦琵琶

申屠衡 一首

衡字仲權大梁人徙居長洲洪武三年徵至京  
草諭蜀文稱旨授翰林院修撰謫徙濠有叩角

集

宮詞

青瑣春閒漏點稀博山香暖翠煙微隔簾誰撼金鈴響  
知是花間燕子歸

江漢 一首

漢字朝宗會稽人徙居嘉興洪武初以文學徵  
仕翰林院編修

題破窗風雨圖

若有人兮青雲衣佩玉玦兮光陸離爰處兮爰居左琴  
劔兮右圖書輕富貴兮浮雲保厥美兮天真山房兮寥  
落天冥冥兮雲漠漠雨瀟瀟兮風夜作心耿耿兮不寐  
紛遑遑兮求索彼薄夫子貪婪惟聲色兮是耽文繡兮



膏梁蓀何為予懷慙秋蘭兮可紉吾所思予古人寒檠  
兮雪案甘與君子相親

趙俶一首

俶字本初紹興人元鄉貢進士明初官翰林待  
制

續蘭亭會補參軍孔盛詩

暄風播曠宇欣懷託陽春盥被寄幽暢虛襟遺世塵擷  
芳遵丘阿接杯沿澗濱詠歸何逍遙遐哉仰斯人

詩話詩不見佳取其有晉人遺韻

桂彥良一首

彥良名德稱以字行慈溪人洪武初待詔公車

以白衣賜宴除太子正字尋為晉府右傅改長

史追贈編修謚敬裕

烏繼善云先生詩文在鄉里曰清節集在京師曰清溪集春和詠言為王傅時

白山西集為長史時曰拄笏集還鄉後曰老拙集又有和陶詩中都紀行皆不在集中其字句雖刻削點綴自令人稱道不已

詩話長史以德望重韻語非其所長然如巴園五月收丹橘丙穴三春饌白魚亦小有風致吳江史明古為作傳稱孝陵嘗咏科斗云池上看

科斗分明古篆文命長史續之應聲曰惟因藏水底秦火不能焚可稱敏絕

和陶

我生雖阨窮牆屋亦苟完集芳被荷衣隱居思鷓冠素  
無怨懟心安有憂戚顏明月照溪堂清風隱柴關螺杯  
偶獨酌焦尾時一彈悠悠五噫歌遠懷梁伯鸞庭前種  
梧竹清秋共高寒

王鏞一首



鏞嘉興人洪武庚戌舉人翰林院編修

詩話子年十七避兵練浦歲已丑崔符四起乃移家梅會里里在大彭  
嘉會二都之間市名王店或曰石晉時鎮遏使遠居此故名或曰宋尚  
書居正之宅或曰元學士景家於是或曰元學正綸也傳聞各異已亥  
十月訪蔣布衣之翹於射襄城蔣語余曰子知王店之所由名乎洪武  
中孝廉鏞及弟鈞之所居也因出所輯樵李詩乘則二王詩俱在焉并  
出二王合刊詩彙舊本共一冊燈下讀未竟客至車轉飲而罷甲辰四月  
再過之不值又數年而蔣逝無子遺書盡失可歎也後見水竹居詩一  
卷中載二王題咏各一首因亟錄之水竹居者處士朱克恭之宅距語  
兒鄉東六十里地曰澄林當時郡人馬盛為記貝瓊為志題詩者二王  
而外有金天藻陳麟陳熊陳振孫詢熊詩云到門碧色帶初雨滿地綠  
陰遮暮天振詩云玉簫吹徹天如水釣艇歸來月滿村鈞詩云候門童  
子低於鶴留客軒窗小似船熊為清江弟子見清江游及山記詢府志  
有二人一分宜丞一汀州知府餘皆不得而詳矣梅會一作梅匯水曰  
梅溪鏞詩所云吾家舊在梅溪上是也梁孟敬石門集有題嘉興王氏  
梅花莊詩未審即是二王所  
居否因錄鏞詩附志於此

水竹居為朱克恭賦

碧水澄潭自作洲琅玕多種屋東頭旋燒新筍安茶竈

時斫嘉魚踞釣舟客至罷邀明月飲人間何必五湖遊

吾家舊在梅溪上遙憶清風度早秋

劉 紹 五首

紹字子憲後以字行建昌新城人 明音類選作吉安人 洪武

中官翰林應奉詩載元音遺響

詩話子憲與盱江胡布子申張達季克為郡人張烈光啓胡福元澤類  
編其詩號元音遺響度其初三人皆不仕于明者而府志載紹於洪武  
中官翰林應奉文字後以國子助教致仕則不得謂之元音矣登道山  
亭五言遺響不錄考子申詩序云僕與子憲為世姻家曩俱客閩師不  
克所志斯蓋客閩時作子申又為紹作山居十詠其三曰仙臺山則在  
新城縣西南三十里而元澤編子憲詩題曰黎川劉紹然則紹非吉安  
人審矣

秋懷 三首

緬俗結紆軫易初吾弗為臨流采香薄日與佳人期舉



世厭芳草薰藉以同施撫襟悵予懷策駕臨海涯聞有  
魯連子千金棄如遺高情儻可起攜手斯與歸  
大化日旋運曦娥去悠悠俛仰宇宙間身命誰能留迷  
復昔在已不耕寧有秋雞鳴起為善思與大德傳朝露  
竟幾何悵然日增憂

陰陽鼓橐籥日月如轉丸  
窅窅神化運誰能測其端  
春暘美萬物秋露淒以寒  
乘時變榮悴天道終可言

邯鄲

訪古慕英俠壯游過邯鄲  
連山飛翠來馬首如揚瀾  
貫酒呼美人浩歌弔平原  
憶昔致多士儲才濟時艱  
賓筵粲珠璣簫鼓清夜闌  
蹇我匪脫穎懷賢邀難攀  
干戈浩縱橫長路方漫漫  
感激詎有已登車摧肺肝

登道山亭

名藩跨炎服崇阜極幽爽  
亭臺納元氣磅礴俯深廣  
我來屬初霽心與孤雲往  
蕭颯海樹秋如聞暮潮響  
摩挲石闌古揮霍霄漢上  
大有本空虛河山一溟漲  
淒涼乘槎意迢遞紫霞想  
濁世誰復然臨風默惆悵

林公慶

一首

公

松江新舊府志失書公字

慶字孟善處州人明初官翰林出為

松江知府

詩話孟善守松江葬三高士于于山東麓見魏文靖集而顧東江作府志官籍民闕皆闕焉不詳後來者更不足責矣

長沙



岳麓道林何處是  
郡人遙指水西邨  
儒官佛寺俱無迹  
竹樹如麻暮雨昏

明詩綜卷四

明詩綜卷五

小長蘆 朱彝尊 錄

歙州 汪與圖 緝評

趙 沔 一首

沔字子常休寧人  
隱居東山元季輔元帥汪同  
起兵保鄉井授江南行樞密院都事丙申內附  
洪武二年召修元史書成不願仕還有東山集

汪仲魯云子常詩因感發而形之詠歌雖不專乎是然長篇短哦亦不  
一字苟爲也 詹烜云先生詩五言初學六朝後改習建安諸子及老  
杜近體則  
學唐人

靜志居詩話東山環谷二先生俱以經學重尤研精春秋環谷守康侯  
之說東山學於黃楚望首闢夏時冠周月之非不相雷同故陳敬初贈  
詩云君之博洽漢馬融春秋三傳以例通百源雖異委則同二先生於  
吟詠均非所長趙差勝汪趙集歲久淪闕其裔孫吉士視權揚州鏤版



傳以

與葉宗茂遊山村

村北村南春事幽故人亂後得相求  
倉皇屢作經年別邂逅能無一日留  
丁令歸時空有恨虞卿窮久不須愁  
卜居共愛清溪好先向沙邊具小舟

汪克寬一首

克寬字德輔一字仲裕祁門人隱居環谷教授

洪武初召修元史書成固辭不仕有環谷集

孫豹

人云環谷七言古詩在長吉子瞻之間

哀鄒山處士

大化無私兮猶延埴之陶鈞  
跖何命之長兮回何命之

屯嗟哉斯人兮樸以醇夫何災疾兮四體不仁  
越星周而弗瘳兮重子姓之悲辛丹青彷彿兮  
迥然笑顰魂胡不歸兮鄒山垠

陳基 二十一首

基字敬初臨海人仕元為經筵檢討歸值用兵

開行樞密府起為都事轉江浙行省郎中參張

士信軍事尋參太尉府軍事遷學士院學士吳

平召修元史賜金而還有夷白齋橐

顧仲瑛云敬初古文詩章同輩

雖極力追之不能及

敬初在藩府飛書走檄皆出其手敵

國分爭語多指斥吳亡之後其臣多見誅戮而敬初以廉謹得免今所

傳夷白齋集指斥之詞儼然臚列後人亦不加

塗竄太祖之容敬初何啻魏武之不殺陳琳乎

詩話敬初家臨海丹丘之麓其在吳結小丹丘戴叔能為作記其詩亦

叔能所編顧仲瑛輯前後交友詩為玉山雅集柯敬初以下即次以敬



初詩謂同輩極力追之不  
及蓋當時之月旦然矣

山高寄陸玄素

謂山高兮其上有天謂地厚兮其下有泉天不可升兮  
地不可極我思古人兮為之太息古之人兮謂誰山之  
中兮水之渚孤舟兮容與俯狎步兵兮仰招鷗夷非夫  
人兮爾曷從之

雞鳧行

雞與鳧皆鷖育鳧愛水遊雞愛陸鳧昔未辨雌與雄母  
不顧之雞為伏雞渴不飲飢不啄以腹抱卵誰敢觸鳧  
脫鷖雞鼓翼日日庭中求黍稷嗚呼鳧使之食鳧羽  
日離襪一朝下水不顧雞雞在岸鳧在水賦性本殊徒  
爾耳雞知為母不知鳧恨不隨波共生死

刈草行

原上秋風吹百草半青半黃色枯槁城頭日出光杲杲  
腰鎌曉踏城門道門頭草多露未晞爾鎌利鈍爾自知  
一人刈草一馬肥馬不肥兮人受笞城中官廩三萬匹  
一匹日餐禾一石

秋懷二首

羣動夜已息秋聲適何從仰視天宇高微雲浩無蹤明  
月在庭戶河漢上縱橫既莫知所始何由究其終我獨  
絃我琴微風入疎桐寫作清商調感慨意無窮  
我有一樽酒獨酌不成歡豈無骨肉親悠悠隔河山亦



有平生友合并良獨難古人千載上世遠不可攀何如  
與明月徘徊松桂間月既知愛我流輝照衰顏我亦知  
愛月託心同歲寒長願玉宇淨河漢生微瀾此月不可  
負此樽不可乾天地等逆旅流年若驚湍古人雖云遠  
其言美芝蘭舉觴以和之對月長盤桓

待王子充未至

屏跡遠城闕幽棲向林阿永懷同心友褰衣起婆娑憶  
昨走京邑彌年阻關河結客燕趙間頗覺增悲歌逸驥  
謝羈紲冥鴻辭網羅所念聖哲遠中心良匪他夏屋蔭  
嘉木芳池發新荷須君此弭節日夕共委蛇

夏日喜友見訪

兀兀少寤語悠悠多遠懷斂跡昉僧夏凝神企心齋美  
人忽至止良友與之偕闕其類逃虛罅爾覲所諧跡邇  
志彌愜情敦禮無乖衣褐貴懷璧屬辭慚類俳積雨霽  
初夕清飈埽餘霾願言念幽獨日此憩朋儕

通州

渡江潮始平入港濤已落泊舟狼山下遠望通州郭前  
行二舍餘四野何漠漠近郭三五家慘澹帶藜藿到州  
日亭午餘暑秋更虐市井復喧囂民風雜南朔地雖江  
淮裔俗有魚鹽樂如何墟里間生事復蕭索原隰廢不  
治城邑僅可託良由兵興久羽檄日交錯水陸輓粟芻  
舟車互聯絡生者負戈矛死者棄溝壑雖有老弱存不



克躬錢鏐我軍實王師耕戰竝宜作惟仁能養民惟善  
能去惡上官非不明下吏或因覺每觀理亂原媿乏匡  
濟略撫時一興慨悲風動寥廓

海安

淮海水為利轉運有常程積渠如積金守防如守城邇  
聞渠隄壞水決如建瓴我軍賴神速僇力障頽傾舊防  
幸已復新畚亦宜興古人慎舉衆日費千金并尅敵務  
克糧足邊資力耕矧茲淮甸間沃野富吳荆艸萊日加  
闢餽餉歲彌增勿使土遺利坐令儲峙羸東南力可舒  
根本計非輕欲弘中興治斯事力當行陋儒無長算觸  
事有深情冉冉趨畏塗戚戚慎宵征

泰州

吳陵古名邦利盡揚州域舊城雖丘墟新城如鐵石昔  
為魚鹽聚今為用武國地經百戰餘士恥一夫敵征人  
還舊鄉下馬問親戚躑躅慨蒿藜徘徊認阡陌桓桓霍  
將軍出入光百辟位重言益卑功高志彌抑誓欲報仇  
讎不肯懷第宅人羨到家榮驚喜爭太息白日照旌旗  
閭里有顏色皓首太玄經雖勤有何益

上樂

夕次泰州郭朝行上樂里密雨灑蒹葭秋風拂菰米頗  
聞承平日魚鹽賤如水簫鼓樂叢祠謳歌動城市中原  
正格鬪擊柝聞四鄙官道日萋蕪生人倚螻螳依依煙



際舟兩兩舟中子來往賣魚鰕出入官軍裏生長離亂  
間不識紉與綺失喜見王師被服多華侈買物不計錢  
僕僕更拜起何當罷戰伐萬國收戎壘山河歸礪帶車  
書復文軌有地盡蠶桑無人不冠履腐儒亦何需歸山  
守枌梓擊壤樂餘年此樂無窮已

令丁鎮

水路由下樂前赴令丁鎮落日淡平蕪荒村帶寒燐曩  
時富魚稻稅薄民不困蓮芡每時豐亦足備饑饉江湖  
歲或艱老弱行蠢蠢相攜就淮食不得辭遠近四野今  
盡荒百畝無一墾鞠爲鳧鴈區無復限封畛師行輜重  
隨士飽筋力奮經費固有常變通亦宜論吾聞古賢將  
羊陸開吳晉食足邊備多高標邈千仞

務子角

頻歲事行邁敢云筋力衰官軍渡淮海父老逐旌旗騎  
士盡羆虎舟師皆水犀踴躍趨敵場謳歌雜華夷行行  
務子角所過悉瘡痍草木未黃落風露已淒其僕夫跽  
謂我歲暮寒無衣故鄉日以遠道路實嶮崎我方戒徒  
侶師行有成期貴賤皆形役遑敢恤其私賴有同袍彥  
議論各瓌奇有酒即共飲聊復慰羈離

海安過牌得風出爛泥洪

舟過海安插路轉爛泥洪水行九十里決潏趨秦潼月  
黑星漢高四顧無人蹤縱有百尺牌不如數尺篷是時



天宇霽餘霞散晴空  
篙師無他術仰面呼南風  
夜來水鳥鳴出沒西復東  
其聲類人嘔聞者思挽弓  
吾聞亦駭異莫究吉與凶  
得非卑濕區窳池蚊蚋鍾  
暑夕咬人膚蜂蠆尚可容  
此鳥號蚊母蚊吐利於蜂  
往往陂澤內雌呼命其雄  
春氣一以和託巢蘆葦叢  
此鳥信可憎彼蚊幸未逢  
所憂亡命徒持刃匿草中  
晝伏夜間伺為毒甚斯蟲  
我方事師旅禁暴哀人窮  
此輩若不除厲民安有終  
所過戒吏卒反覆開盲聾  
爾寔備官守責在兵與農  
自古處邊圉盜戢商旅通  
陽德始發生人事宜肅雍  
簡書雖有程我行憂慮從  
歎息行路難何由辭轉蓬

青絲絡馬頭送李彥章

青絲絡馬頭游宦古蘇州  
蘇州城東萬斛舟前年運米  
直沽口送別江頭折楊柳  
承恩頭插上陽花錫宴尊傾  
光祿酒江上今年楊柳黃  
辟書千里有輝光勇騎閩外  
將軍馬飽食閩中荔子漿  
閩中女兒歌白苧把酒勸君  
起為舞將軍好文不好武  
自古閩中稱樂土

送李景先錄判

閩門柳枝短君行不可緩  
贈君不折楊柳枝勸君飲此  
金屈卮丈夫將身誓許國  
何用當歌傷別為青絲絡鞵  
黃金勒游宦鄱陽山水國  
何處春風最憶君琵琶洲上  
縈蕪碧

十六日解維值北風大作復泊北門



風急江難渡春寒雪更飄濟川雖有楫跨海恨無橋使  
節辭吳近官軍去楚遙北門仍繫纜山雨夜蕭蕭

寄玉山

江上秋陰日漸多思君不見奈愁何風高澤國來鴻鴈  
露下汀洲落芰荷公子文章裁重錦美人衣袖翦輕羅  
画船亦欲溪頭去聽唱花間緩緩歌

婁江即事簡郭義仲瞿惠夫秦文仲陸良貴兼寄

顧草堂

婁江江上樓居好滄海海頭城邑新蠻郎打鼓爭起柁  
鮫客捧珠思售人風燈照夜不數點霧月湧波才一輪  
浮生會合豈易得看劔引杯寧厭頻

陸氏別業

窈窕西池一徑通赤闌如画倚晴空風微燕雀飛塵外  
日皎龜魚在鏡中入谷謾誇盤往復卜鄰宜住瀼西東  
綠陰滿地新荷發猶勝開樽勸碧筒

題倪元鎮画

西池亭館帶芙蓉雲水蒼茫一萬重此日畫圖看不足  
滿簾秋雨夢吳淞

胡翰十九首

翰字仲申一曰仲子金華人國初以薦授衢州教授

名修元史成賜金帛遣歸有胡仲子集宋景濂云先生出言

簡奧不煩而動中繩墨如夏圭商敦望而知其非今世物也朱叔英云仲申五言古詩超然躋邁雖潛溪亦莫企及餘子何足道哉



詩話明初浙東睦有徐舫詩派甌有趙次誠詩選越有求漁鍾秀集而  
金華承黃文獻潛柳文肅貫吳貞文萊諸公之後多以古文辭鳴顧詩  
非所好以詩論吾必以仲申為巨擘焉獨孤及之論曰五言之源生於  
國風廣於離騷著於蘇李盛於曹劉漢魏作者質有餘而文不足以今  
揆昔則有朱紘疎越太羹遺味之歎誦仲申五言正猶路鼗出於土鼓  
篆籀生於鳥跡庶幾哉升堂之彥乎宜潛溪有學林老虎文淵鯨之目  
也

### 湘筠辭

湘之山兮西迤湘之水兮東驚何箇籟兮孔多望不極  
兮湘之浦帝子去兮雲中俾夫人兮延佇曾莫樹兮椒  
蘭又莫搴兮蘅杜載雨兮載陰滔滔乎誰與度將以遺  
予子琅玕抱幽貞兮永固

### 鬱鬱孤生桐

鬱鬱孤生桐託根鄒嶧顛皎皎白素絲出自岱畎間一  
朝奉庭貢妙合良自然桐以為君琴絲以為君絃中含  
希世音置君離別筵征馬慘不嘶僕夫跽當前君行千  
里道豈惜一再彈南風日渺渺清商動山川和者昔已  
寡聽者今亦難

### 人生苦偏側

人生苦偏側莫處蠻觸間殺機起不測朝夕相構患尺  
書下齊城丸土封秦關用意何崎嶇舉世尚其賢湯泉  
水長溫蕭丘燄長寒天地有至性貧賤吾所安

### 擬古

四首

一夕復一夕一朝非一朝昨見春花開忽覩秋葉飄人  
非金石姿安得長不彫窮年事觚翰駕言遠遊遨手提



具櫛劒拂拭鷓鷯膏含精變光彩上薄青雲霄願君勿  
棄置佩此長在腰南山有猛虎西江有長蛟斫蛟取猛  
虎始貴非鉛刀

節節復促促雄鳴雌自續借問此何音有鳥人不畜三  
文被身體五采爛盈目聲諧九成奏靈出衆羽族自從  
阿閣傾再改岐山下千年不來儀四野多暇曠世德誠  
已微天路清且穆願因東南風吹度玉笙曲

千里不唾井與君相別難風塵雖異路恒願同悲歡在  
金莫爲缺在玉當爲環聯以翠織成宛轉衣帶間相望  
燕與越寸心良自堅日入已三商憂來翻百端遙遙託  
清夢不知寒夜闌

日長自愛惜夜長復悽惻人生幾何時少壯已非昔涼  
風動萬里起念南與北山川路杳杳車馬去不息燕趙  
高聲名荆揚壯材力仲尼七十說未遇身削跡爲雲不  
上天焉能雨八極

示項生

去日不可追來日猶可期朝采六藝英夕玩忘其疲海  
是衆水積聖亦塗人爲挾冊自有得焉用比皋夔

游仙詩

夙志慕仙術笑傲人間春朝陪瑤池宴暮揚滄海塵道  
逢安期生遨遊乘采雲粲然啓玉齒遺我紫金文天地  
此中畢世人不得聞受之今十年留待逍遙君青鳥從



西來飛去扶桑津寄書久不到白首悲秦人

卧龍岡觀賈秋壑故第

宋祚移東南會稽國內地白日照城郭相君開甲第蜿  
蜒卧龍岡高出列雉背審曲立萬楹增雄踰九陞飛拱  
凌丹霞交疏激清吹上極高明居下有幽深隧棲甲戒  
不虞為計亦已至以此忠社稷寧復憂隕墜揚揚昧所  
圖擾擾復多制崦嵫日西薄祝栗風南厲魯港十萬師  
聞鉦一聲潰木披本先蠹隄壞川如沛詩人謹厲階人  
禍豈天意摩挲岡頭石零落重奎宇山川一何悠蒼莽  
鴻飛外舊時賀老湖酒船總堪繫吾寧慕賢達聊以抒  
長慨

呂梁洪

河水趨山東四曠無險塞呂梁扼其衝凜若萬強敵水  
勢與石鬪終古怒未息舟行齟齬間衆挽不餘力進始  
踰跬步退忽落千尺長年起相語茲土神所職登祠奉  
嘉薦拜跪陳下臆船頭勇牽纜檣表高挂席好風東南  
來送我天北極叱馭誠足欽垂堂詎遑恤昔聞莊叟言  
有山在離石懸水三十仞魚鼈皆辟易孰墮天地性遂  
拯生民溺鴻飛九州野吾願觀禹迹

夜過梁山灤

日落梁山西遙望壽張邑洸河帶灤水百里無原隰葭  
茨參差交舟楫窈窕入劃若厚土裂中含元氣濕浩蕩



無端倪飄風向帆集野闊天正昏過客如鳥急往時冠  
帶地孰踵萑蒲習肆噬劇跳梁潛謀固坏蟄古云萃淵  
藪豈不增快悒蛙鳴夜未休農事春告及渺焉江上懷  
起向月中立

書黃賀州平蠻事後

荆楚縣百越襟帶極遐裔連山限車轍外薄海無際風  
氣何紛厖羣蠢動相噬古雖郡縣置畫地出租稅負險  
恒自固犬牙植形勢聚若蜂螳來散如鳥鼠逝堯仁不  
能覆往往思一雉懸兵萬里外暴露蒙瘴癘亦有內齊  
民註誤混狂獠巢穴牢弗破根本先自殪天遺槃瓠種  
出入民患害聖哲戒不虞窮討諒非計皇靈冒下土赫

赫火俱厲日月所出入有生盡懷狹賔賀崎嶇間苞檠  
久聯締遣吏得黃侯爲國開信誓王師不血刃緩頰下  
椎髻列功奏天子璽書遠頒賚賜以大銀盃副之金帛  
對嶺海數十城安得百其喙我聞范史言此屬非難制  
力弱校弄薄非可羌戎例漢廷慎擇守祝良復誰繼侯  
今鬚盡白侯心甚豈弟分符浙水上應念東人勤蠻徭  
尚有知東人敢忘惠作詩期不隕庶以示來世

西村老人隱居

振轡起陳力投簪遂辭祿吾今見伊人逍遙在郊牧令  
節春載陽芳辰日初旭鳥鳴高樹顛牛飲澗溪曲翳翳  
桑柘陰藹藹來牟熟耰耔返故畝經過候新躅高榻生



風涼練衣無暑溽披帙欣自悟臨觴復誰屬情真不肅  
客意豁已忘俗列生談力命老氏貴止足

夜宿寶石精舍

出郭隨穉子薄暮投山扉葉落故園樹危柯風更悲勞  
生各已息不知夜何其上人池閣中燈火深相依盈樽  
豈無酒多病久不持啖我園中果飽我以豆糜出戶見  
明月踏月褰裳衣悠悠故意長落落新知稀冉冉歲云  
暮百爾慎所歸

京口紀行

大江風西來波濤一何浩我舟不得發徘徊越昏曉衡  
運已朔易曜靈忽東杲早出南徐州草乾霜露少慘慘

沙塵飛軋軋車輪繞寒氣來薄人重裘僅如縞日高衆  
鳥翔天末孤帆杳川流與岡勢合沓自回抱人生大塊  
間孰能出其表勉為辛苦行益見顏色槁人言野多虎  
前驅善相保顧非千金軀祇欲仗穹昊共子陳此情歸  
來卧蓬島

南京遇蘇平仲編修

南州苦寒月雨雪久不霽風沙滿長道四顧心飛揚君  
子有行役束書歸故鄉故鄉浙水上遠在天一方父母  
及兄弟昔別今五霜我昨來自東音問不得將為言起  
居好良足慰子腸巍巍帝王都濟濟人物場噦噦爭先  
鳴翩翩迺高翔六館走相送如失孤鳳皇惜茲歲華晚



眷彼川路長卧聽吳門鐘歸共越人航上堂拜家慶兄  
弟同樂康歡言酌春酒拜舞迎春陽願言千丈暉長照  
百年觴

青霞洞天偕章三益僉事觀石枰

太末一為客倏忽三四齡常恐玄髮變未諧滄海情今  
晨屬休暇文彥皆合并方舟濟沙步飛蓋指巖扃青霞  
天之表赤日午正亭息陰無擇木抱渴無藏冰寧知大  
穴維有此真福庭巨石跨千尺如梁架青冥深疑地肺  
開洞見天光明玉樹交左右禽鳥無一聲涼風度澗水  
炎濁蕩然清昔聞偶奕者坐隱交心兵相持勢方急苟  
睨耽若醒柯爛胡不歸海枯固其恒蠻觸遞翻覆大化  
何由停不如飲美酒且置石間枰

送呂君采元史北平

又見陳農去遙臨析木墟山川遊幸後文獻亂離餘備  
極傳聞異歸從直筆書百年殷監在盡獻玉階除

陶凱二首

凱字中立天台人至正丁亥鄉薦洪武初召修  
元史除翰林應奉文字陞禮部尚書出為湖廣  
參政致仕復召為國子祭酒以參政致仕

詩話洪武元年帝既平定朔方金匱之書悉輸祕府冬十二月詔發所  
藏元十三朝實錄纂修元史命宋濂王禕為總裁官徵山林遺逸之士  
凱與祁門汪克寬德輔金華胡翰仲申餘姚宋元禧无逸臨海陳基敬  
初休寧趙汭子常新淦曾魯得之淳安徐尊生大年鄭傳恕如心新喻  
趙堦伯友長洲謝徽元懿傳著則明高啓季迪寧波張文海及黃麓王  
錡凡一十六人相傳龍溪林弼元凱亦與史局然余曾見內閣所儲林



登州集其序傳均未言其修史蓋林所修者禮書也至大年詩集有送  
操琬公刻還鄱陽作其一云宿德高年史局尊經旬病廢想丘園相期  
麟至方投筆忽報驪歌已在門幽谷便須從李愿空齋恨不閉何蕃芝  
山當戶青如舊笑把青巒入酒尊其二云汗牛何啻三千牘奕葉相兼  
二百年太史網羅無軼事諸生緜蕤媿新編綠陰晝永毛錐健青瑣宵  
分蠟炬連千里揚帆東匯澤也應回首會丹鉛潛溪亦有送琬詩云帝  
曰元有史是非尚紛揉苟不亟刊修何以示悠久宜簡巖穴臣學識當  
不苟衮斧嚴義例執筆來聽受使者行四方持檄盡蒐取非惟收譽髦  
最欲尊黃耆予時奉詔來君亦至鍾阜一見雙眼明不啻蒙發蔀大啓  
金匱藏一一共評剖發凡及幽微勝辨白與黜奈何君有疾客邪干氣  
母翩然賦式微使我心中疚則琬實與編摩者宋无逸寄潛溪詩云當  
時十八士去留各有緣所云十八士者公刻居其一矣以先去故未得  
列名也是年秋八月書成丞相宣國公李善長表上時克寬訪基元禧  
輩皆引歸不受爵仕者亦未盡通顯惟凱與魯位三九之列二公詩俱  
罕傳祭酒長歌  
特雄放可喜

### 長平戈頭歌

長安野人鑿地得古戈上有疑字歲久俱滅磨惜不能  
如豐城古劍射牛斗吁嗟戈乎奈爾何但見青銅凝寒

暮煙紫月黑山深夜飛雨恨血千年猶未銷荒郊夜夜  
啼冤鬼當年趙括輕秦人降卒秦坑化為土嗟哉趙亡  
秦亦亡落日荒城自今古摩挲爾戈一問之令人為爾  
生愁思何不以爾為鍾鐻何不以爾為鼎彝吁嗟戈乎  
徒爾悲爾今還當太平世人間銷兵鑄農器願壽吾皇  
千萬年終古不用戈與鉞

### 贈琴士施彥昭

君不見鳴琴無賞音伯牙絕絃仍破琴又不見斲琴無  
良工焦琴終為爨下桐大江之南多好山孤桐往往生  
其間武林城中百萬家斲琴施氏良足誇嗟哉施氏之  
外無復人桐樹枯死終為薪今人好尚與古異人間雅



琴多棄置雅琴苦少秦箏多嗟哉施君將奈何

曾魯一首

魯字得之新淦人應召纂修元史編類禮書入儀曹為祠部主事超拜禮部侍郎以病乞歸道

卒有守約齋集

徐大年云南京有博學之士二人以舌為筆者曾得之也以筆為舌者宋景濂也

詩話侍郎在史館潛溪稱其補苴罅漏功最多既為志墓又贊其像云當議禮而考文較損益於錙銖蓋其所長不在吟詠也詩彙失傳僅錄其送黃尊師還九宮山一首黃尊師者雙井人涪翁八世孫也弱冠以門資襲爵為固始尉患風痺棄官有神師號金花君者曰吾能療汝疾愈當為道士尊師許諾金花君以帛黏其膚炳灼之七日而起乃之興國九宮山為道士主欽天瑞慶宮其徒千人太祖西平江漢尊師迎於鄂渚應對稱旨後八年召至南京命儀曹設燕享之及還侍郎及潛溪俱送以詩潛溪詩曰崔崔九宮山翠甍倚曾青飛觀峙後先宸奎爛晶熒中有避世翁霞衣佩葱珩仙徒一萬指執簡聽使令年來邁兵燹散走如流星翁獨牽青牛尋雲自躬耕翠華幸江漢扈從森幢旌俯伏黃鶴磯再拜陳中情天日下臨照簪裳受餘榮今又奉璽書翩然覲神京大官給珍膳法酒雙玉餅祇因逢景運重際泰階平致使方外士恩寵

霑鴻靈一旦賦歸歟行裾逐雲輕自言當弱冠綠袍佐山城風露感未疾離家煉黃寧藥烹日月鼎符書龍虎經中氣昭象先玄覽極窈冥欲期啓泥丸翬飛出孩嬰名花滿皇都春風語流鶯景物非不饒歸思竟纏縈芳歲去如矢逝波日堪驚純陽一銷鑠重陰遂相乘余聞重自媿顛毛類枯莖逐物向役棲身亦筑筑幸有一寸丹能與萬化并何時滴秋露相期注黃庭侍郎則賦長歌中間敘尊師本末頗詳山為真牧張真君道靖鍊丹之所故詩有真牧之子世莫儔之句其事不甚著故具書之

贈黃道士還九宮山

我家羣玉山南陬君居蒙頂最上頭相望欲識嗟無由  
搖搖心若風中旂君從少年慕遠游摩斥八極隘九州  
下視起滅如浮漚九宮山高明翠虬真牧之子世莫儔  
君居其間業清修五十餘載無悔尤翠華昔駐鸚鵡洲  
承恩名對黃鶴樓敷陳屢荷天語酬大官醉以白玉甌  
去年弓旌復旁搜麻鞋徑入朝冕旒神皋繁麗不肯留



還山日夜稽首求山中之人書遠郵雨餘黃獨苗新抽  
琅玕芝草弄春柔不歸負此巖壑幽龍江送別情悠悠  
鄉人歌作商聲謳

宋 禧 四首

禧初名玄禧字无逸餘姚人學於楊維禎洪武  
初徵修元史有庸菴集

詩話无逸有盛名詩見於選本絕少予購得其集句如欲雪未雪雲葉  
暗似暮非暮風花寒隔河雞犬春聲急繞屋田園豆葉肥九歲兒郎能  
負米半生客路未歸田當時未覺青山好此日重來白髮多臘月雨連  
元日雨故鄉人作客居人借人几榻開漁舍送客壺觴出酒家秉燭山  
林連夜宿思家道路幾人歸驚心世事三年後照眼梅花二月初且復  
殺雞留宿客未須采藥入青山空中書寄仙人鶴月下詩成佛寺鐘臘  
雪已消三尺盡春潮初送一舟行試看墨本打碑賣勝謁朱門冒雪歸  
十日看山坐西閣一春多雨怕東風惡客不來成好夢大兵已過定豐  
年南山種樹人猶在東閣看花客再來勝地江山後見高天風雨客  
邊聞青春誰解看花去白髮真成秉燭游身到名山頭已白眼明秋日

葉初紅惜春幾度行花徑載酒先期過草堂落筆十年身後在懷人三  
絕眼中無梅梁水涸魚龍遠麥隴沙乾鴈鷺稀人日晝陰開晚照老年  
寒極愛春風艱難人事都非舊貧賤交情倍覺真黃葉又經秋夜雨青  
鞵曾踏歲寒冰南山臘雪新年在東浦春潮昨夜來樹繞石頭知客路  
巖迴谷口見人煙鐘聲曾聽孤舟夜詩卷今題落葉時二月江村三日  
雪百花時序半春陰對法流轉頗饒自然之趣其寄景濂學士詩云修  
史與未役乏才媿羣賢強述外國傳荒疎僅成篇則  
自高麗傳以下悉无逸手筆覽元史者所當知也

### 看雲樓

孤雲何處來相對纔咫尺隨風出山去青天忽無跡往  
來固無心幽人候朝夕高樓為徘徊無使長相憶

### 送友人

老去復相見別來今幾年窮鄉君再到多病我堪憐渡  
水山雲薄當樓海月圓客邊愁送客頭白聽啼鵑  
次韻徐性全同宿小山陳氏書樓有作



出郭天猶暖登山興獨深雨餘初衣褐秋盡未聞砧黃  
葉經過處青燈故舊心客樓頻對榻倡和有清吟

四月十三日偕岑宗昭胡斯美及其徒弟斯敏游  
宿竹山精舍明日題詩於壁而還

龍潭橋西山谷中茅屋住者皆樵農兵前送官大木盡  
春後斲筍高峰重同行何人黑漆髮精舍有佛黃金容  
三更月明五更雨子規來叫門前松

徐尊生 二十一首

尊生字大年淳安人召修元史授翰林應奉文  
字有懷歸橐

詩話大年詩格清老譬諸画手絕無鉛粉之飾顧諸選家多不甄錄何  
也其懷歸集中有授翰林應奉詩云布衣昨日孤寒士翰苑今朝已授

官幼有文章淹滯久老無筋力進趨難隨班香案晨簪筆列坐宮門午  
賜餐早晚歸休宜引分免教白髮點金鑿則當日業通籍矣又呈崔尚  
書五古則禮部尚書亮也大年雖自引求去而省臣留之續修庚申君  
史又編集禮樂書迨三年九月大明集禮書成乃始得歸故歸舟詩云  
兩年留滯帝王州也至六年九月詔編日曆復與纂修之列又固辭還  
山拂帝意出為陝西教授未行而卒 引睦州志謂曾授翰林待  
制不就 誤矣

挂劍臺同楊廉夫作

荒臺多悲風下馬弔古人古人重意氣今人亦霑巾湛  
盧化為土意氣千古存顧瞻四鄰交朝盟暮仇冤孰持  
不言諾慰此泉下魂古人不可見今人難重論

朱太守祠

太守得意日五十當行年余年適復爾出山良自憐東  
風過荒祠下車一慨然浮名亦何有千載隨飛煙富貴



非所願夢想東皋田

題番陽蔡淵仲散木菴

蒙莊古達士涉世熟憂患著書雖寓言垂戒非誕謾有生勿爲材祇以身試難杞梓堪棟梁何曾保枝幹彼樗乃散木匠石眼不看終然老山林長將櫟爲伴年壽齊古椿傲睨寒暑換青黃亦所天豈異溝中斷一篇三致意懇懇義相貫淺窺勿深求千載付浩歎就中一轉語妙處最宜玩旣全曳尾龜復殺不鳴鴈萬事貴無心倚伏昧前算材與不材間至理須剖判舉似散菴人笑齒爲余粲

呈崔尚書

愚生何所長有若不材樹臃腫復拳曲蒙莊匪虛語大患緣有身過客棲逆旅常懷溝壑憂寧軫經濟慮分甘老山林誰復歎遲暮州司忽見臨驅迫出蓬戶欲行勢倉皇不行恐遭怒束書竟登塗妻子那暇顧史筆豈所堪努力強枝拄未免取謗譏何從得褒子金幣落九天深慙聖恩誤陞辭許還山老不任馳騫硯田久已荒尚可歸去况予燕雀姿難遙鴛鷺羽樊籠久飼養反是損天賦自秋俄及冬慳款曾屢訴情急鳴聲哀何啻啼嬰孺恭惟及物心四海仰霖雨便期副所禱俾遂屏幽素江頭買歸舟凌晨首先路

游上善觀



波綠新安江草青賀齊城出城偕逸侶涉江暮春行舟  
維古岸迴徑轉深谷晴琳宮恣幽討從容振塵纓花砌  
藹微馥松房颯幽聲偶值笈箸翁手挈溪螺盈餉因觀  
主厚味許騷人并以茲雅趣愜彌使吾懷清杯觴竟綢  
繆詩筆亦縱橫浮生此暫聚忽散如煙輕遠送何依依  
顧慙方外情

佩刀行

有序

金華之永康有山曰雲巖拔起天半有巨舟藏  
壑中舟尾翹出如薑一釘墜巖下野僧得之以  
遺張君孟兼製為佩刀鈎利特甚尊生為作歌  
神人藏舟半天裏絕壁哈呀露舟尾錚然有物墮中宵

八觚峻噌長尺咫野僧拾之歸張公化為天矯蒼精龍  
不知何世何年閱奇氣剽犀斷虎一旦生神通魑魅却  
走妖邪空張公佩到蓬萊殿天上神仙驚未見青絲緜  
懸白玉環當晝孤光搖冷雷為君淬厲向盤根縱有青  
萍何足羨他年辭榮歸浙山莫行金華赤松間精靈感  
會起霹靂便恐飛去無時還

送宋君諤還明州

勞勞亭邊楊柳青新裁白紵歸衫輕我情頓似楊柳亂  
君意已逐浮雲行一日相逢尚難別何況同居兩三月  
君歸未久我亦歸歸家莫遣音塵稀

松江陸氏耕隱軒



吳下陸龜蒙超然太古風  
圩邊施蟹斲澤畔築牛宮  
香稻三千頃高堂八十翁  
隱名逃不得傳過大江東

游鍾山過寶珠峰頂西軒贈浙僧慈隱

寶珠峰頂危亭角邂逅高僧失垢氛  
便啓軒窗臨絕壁還留賓客坐層雲  
簷端優鉢千香樹肘後楞伽幾卷文  
謾說空門無繫著也須攜手惜輕分

送田無禽任太原同知

無禽家世齊諸田學術乃自余忠宣  
迢迢之官太原郡戀戀回首京都天  
三河從昔產豪傑貳守得子稱才賢  
當筵不作慘別意一杯泛以黃花妍

婺源汪氏樵隱

芙蓉高嶺含清暉宣平之居近翠微  
斧斤丁丁響林薄雲霧滃滃霑人衣  
石碁盤邊莫閒坐樵風涇裏當早歸  
歸來絕不到城市自是世人相識稀

讀元史偶書

前朝實錄與修纂異聞可紀不可刪  
窮河直至星宿海祭天遠在日月山  
笙名興隆雜鳳吹斧號劈正當龍顏  
似茲前古殊未有偶吟一二資餘閒

詩話或問大年讀元史詩中語因疏其事於左黃河之源元潘學士昂霄志之柯博士九思序之陶徵士宗儀述之世祖至元十七年諭招討使都實佩金虎符以行自河州寧河驛度殺馬關約五千里始抵其地越歲乃還言河源在土蕃朶甘思西鄙有泉百餘沮洳散渙衆若列星以故名火敷腦兒火敷譯言星宿也元史祭祀志憲宗即位之二年秋八月始以冕服拜天於日月山王禕興龍笙頌序云興龍笙者世祖皇帝所自作其制爲管九十一列爲十五行每行縱列六管其管下植於匱中而匱復鼓之以鞀自匱足至管端約高五尺仍鑄版作鳳形繪以金



采以圍管之三面約廣三尺加文飾焉凡大朝會則列諸軒陛之間與衆樂並奏每用樂工二人一以按管一以鼓鞀以達氣出聲以叶衆音而樂之奏成矣輟耕錄云興隆笙在大明殿下其制植衆管於柔韋以象大匏土鼓二韋橐按其管則簧鳴篋首爲二孔雀笙鳴機動則應而舞凡燕會之日此笙一鳴衆樂皆作笙止樂亦止劈正斧以蒼水玉碾造高二尺有奇廣半之自殷時流傳至今者朝會時一人執之立於陛下酒海之前所以正人不正之意志雅堂雜鈔云宣和殿所藏殷玉鉞長三尺三代之寶也後歸於金元史禮樂志元正受朝皇帝出閣侍儀使引導劈正斧中行至大明殿外劈正斧直正門北向立俟兩宮升御榻劈正斧退立於露階東故趙孟頫宮詞云天步將臨玉斧來葛邏祿迺賢宮詞亦云千官鵠立五雲間玉斧參差擁画闌是也一器也而或曰斧或曰鉞按禮有朱干玉戚然則此即玉戚云爾

### 七月六日生日有感

客中生日近七夕老子行年當五旬夢寐不忘林壑趣  
形模難作市朝身已甘素髮欺凌我祇怕緇塵染污人  
歸去秫田秋正熟新醪爛醉甕頭春

### 稷下

春官承制促成書東觀遺編任卷舒草草便垂千載後  
遲遲難俟百年餘淹中舊學文空在稷下諸生術本疎  
浪說徐生善頌止懷鉛竊食媿何如

### 新年

江上年華與浪奔天涯心緒向誰論持竿本住桐廬岸  
被褐偶來金馬門足躡風雲非老事鬢垂霜雪是愁痕  
韭苗薺葉添新綠昨夜東風入故園

### 春望

浩蕩波濤海一涯紛紛平陸起龍蛇鶻聲只帶中原恨  
燕子還思舊主家不見昔年遊賞伴愁看滿地落來花  
傷情宋玉愁何限目極遙天日又斜



送博士錢子予還鄉

乞得成均老病身，懸車便向鏡湖濱。  
鄉友爭迎賀季真，落絮繽紛攬別恨。  
歸帆縹緲傷殘春，欲知後夜相思夢。  
鳳闕西頭月色新。

畫馬

白馬被朱韉，牽來過御前。  
憶曾何處見，金水小橋邊。

春山樵唱

二首

共穿石徑踏春晴，却向山腰分路行。  
樹暗雲深莫相失，隔林遙認唱歌聲。

春殘驟雨過蒼巒，瀑流千尺響潺潺。  
貪坐莓苔洗雙脚，牛羊歸盡不知還。

歸舟雜詠

溪雲黯黯覆溪潭，雲罅疎星見兩三。  
半夜不知何處雨，遙看飛電閃淮南。

謝徽一首

徽字元懿，長洲人，以布衣召修元史，除翰林編  
修改吏部郎中，辭歸，復起國子助教，卒于官。有  
蘭庭集。

題宋復古鞏洛園

青山鞏洛舊林園，彷彿昇平古意存。  
兩外人歸秋葉浦，煙中鳥下夕陽村。  
昔年題字宸光合，宋思陵題簽今日披圖野  
興繁。風景西湖仍不異，惟餘故老說中原。



明詩綜卷五

蘇東坡詩集卷五

蘇東坡詩集卷五

蘇東坡詩集

蘇東坡詩集

蘇東坡詩集

蘇東坡詩集

蘇東坡詩集

蘇東坡詩集

蘇東坡詩集



